


KO E HALANGA TĀPUAKI

Ma'á e Kāinga Tonga 'i he

UNITED METHODIST CHURCH

Fepueli 2025



LAU FOLOFOLA FAKA'AHŌ

KO E LAU FOLOFOLA FAKA'AHÓ

Fepueli: Tataki 'e he Maama 'a e 'Otuá: Sivisivi'i mo Fakatonutonu 'etau tauhi kiate Iá. /
"Guided by God's Light: Transformed, Tested, and Adoration of God."

Sāpate, Fepueli 1: Sāpate 4 Hili 'a e 'Epifanī. (Lanumata).

Lēsoni: Maika 6:1-8; Saame 15; 1 Kolinito 1:18-31; Matiu 5:1-12.

Mōnite, Fepueli 2: Lau Folofola – 'Aisea 58: 1-9a.

Ki'i Ama: 'Aisea 58: 1, "KALANGA mei ho loto u'a, 'oua 'e fakama'uma'u: 'Ai atu ho le'o hangē ha talupite, 'O fakahā ki hoku kakai 'enau talangata'a, Pea ki he fale 'o Sēkope 'enau hia."

Pou 'Ao: 'Oku tau kamata mo e Palōfita ko 'Aiseá he 'ahó ni pea 'oku fakamāfana 'a 'ene uki 'o e "Kalangá" ke kamata'aki 'a e Lesoni. Pango pe he 'oku hangē hono natulá ko hano tā 'o ha peleti kalamafofoni 'o māfolofola mo maau e kamata 'a e hivá kae faka'ohovale pe 'ene tatūsia he makohikohi 'a e la'i peletí. Pea ko e taimi ia 'oku mafuli ai e taimi 'o e hivá mo hono fasí. 'Oku pehē 'a e vave 'o e hiki e tō heni mei he fakatotoka 'o e kalangá ki he fehu'i kakaha 'oku fakahoko mai 'e he Palōfitá mei he 'Otuá. Me'á ni 'oku tau kei fiema'u pe mo fekumi ki he ngaahi tāpuaki 'a e 'Otuá lolotonga ko iá 'oku tau fesitu'a'aki mo hotau kaungā fonongá? 'Oku tau kei vēkeveke pe ke kau ki he Lotú mo fai hotau lelei tahá hono tauhi hotau ngaahi fatongia ki he Siasí lolotonga ko ia 'oku tau fakaehaua 'a e totonu 'anautolu 'oku ngāue mai kiate kitautolú? 'Oku mo'oni heni 'a e fanga ki'i fakahua 'oku fa'a fai, "Lele hake e mā." 'Oku tau femo'uekina pe 'i hono teu e ngaahi fatongia ki he Siasí pea ngalo ai ke toe fai ha fatongia kiate kinautolu 'oku faingata'a'ia 'i he sosāietí. 'Oku 'osi 'otu mu'a mai pe mo e faka'uhinga tokua 'oku tau 'osi masiva pe kitautolu ke toe lava ha tokoni ki ha masiva. Mahalo na'a 'oku mo'oni faka-fakakaukau pe 'iate ia, ka ko e tokoní he lau 'a *Mother Theresa*, 'oku 'ikai ko e lahi 'o e tokoní 'oku laú, ka ko e lahi 'o e 'ofa 'oku fai 'aki e tokoní, ko ia 'a e me'a 'oku mahu'ingá. Ko e fakaanga 'oku fa'a fai ki hotau Siasí mo e founa 'oku fai 'aki hono fakalelé (*Polity*), ko e toki a'u ki ha taimi kuo paasi ai ha fokotu'u, kuo 'osi e me'a ia na'e 'uhinga ki ai e fokotu'ú. 'Oku 'ikai ke faka'ikai'i 'e 'Aisea ia 'a e founa 'oku fai 'aki e Lotú mo hono fakalele faka-Komiti 'o e Siasí mo e toutou fakatahá. Ko e me'a 'oku uki kitautolu ki ai 'e he Palōfitá ko hono feinga'i ke fakapapau'i 'oku taumu'a kotoa pe 'a e "founa" 'oku tau ngāue'aki ke fakakakato 'aki 'a e finangalo 'o e 'Otuá 'oku ne ui ke tau fai. 'Oku 'ikai ko ha fehu'i ia pe te tau "Aukai" pe tokoní'i e masivá pe ko ha'atau lotu pe ngāue ke fakatau'atāina 'a e masivá mo e kau tukuhausiá. Ko e fehu'i: ko e hā e ngāue 'oku fai 'e he "Aukai" ki he kakai lotú ke nau lava ai 'o tokoní'i e masivá? Ko 'ene mahino angé: 'Oku tokoní ho'o "Aukai" ke ke lava ai 'o 'ofa mo tokoní'i e masivá? 'Oku tokoní 'etau ngaahi houa ma'unga Kelesi ke ne fakaivia mo fakalotolahi'i kitautolu ke tau tokoní ke fakatau'atāina kinautolu 'oku lolotonga mo'ulaloa ki he ngaahi faingata'a faka-sōsiale, 'ekonimika, fakalotu mo e ngaahi me'a kehekehe pe 'oku mo'ua ai 'a e to'utangata he ngaahi 'ahó ni? 'Oku tala fakapatonu mai pe 'e 'Aisea 'a e me'a 'e hoko he taimi 'oku hanga ai he 'etau lotú 'o fakamaama kitautolu ke fai e finangalo e 'Otuá (tokoní'i e masiva), "*E toki mafoa mai ho'o maamá hangē ko e pongipongi, pea 'e vave ho fakakakano fo'ou: 'e takitau kiate koe ho'o tonuhia; pea 'e tukutau 'a e kolōlia 'o Sihová.*"

'Ānau, Lotu mo e 'Aukai: Tokoni mai 'Eiki ke u lava 'o ngāue'i 'a 'eku tuí ke tokoní'i 'aki ha ni'ihí.

Tūsíte, Fepueli 3: Lau Folofola – Saame 112.

Ki'i Ama: Saame 112: 1, "HALELU'IA! Monū'ia ā ka ko e tangata 'oku 'apasía kia Sihová, 'O manako lahi ki he ngaahi tu'utu'uni 'a'aná."

Pou 'Ao: 'Oku hoko'i atu pe 'e he Fatu Sāmé 'a e taumu'a na'a tau lave ki ai 'aneafi 'i he Tohi 'a e Palōfita ko 'Aiseá. Ko e Tā'anga 'o e 'ahó ni 'oku ui, "Ko e Fiefia 'a e taha Fai lelei." Ko e talanoa ki he ngaahi monū'ia 'o ha taha 'oku nofoma'u 'ia Sihova pea fai ki he'ene ngaahi fekaú. Ko e talanoa mahino foki 'eni 'a e kāinga vāofi 'a e fiefiá mo e failelé 'o fakahingoa 'a e taha fai lelei ko "Fiefia" (Monū'ia). 'Oku kamata pē 'a e fa'u Saamé mo 'ene he'aki 'a e lea Halelu'ia, ko e fakafeta'i ki he 'Otuá Taupotú koe'uhí ko 'ene ngaahi 'ofa ta'efa'alaua kuo toloto monū'ia ai. Fakatokanga'i 'a e ta'emanavahē 'oku 'asi he mo'ui 'a e tokotaha 'oku fai lelei 'oku fakalau 'e he toenga 'o e tā'angá ni. 'Oku 'ikai ke tuku 'a 'ene tutui ke fai 'ofá, pea mole ke mama'o ha'ane me'ime'i pepe'e he foaki ki he kakai masivá. Ko e me'a 'oku 'asi he kau fai lelei ko e fa'ahinga fiefia 'oku loloto ange ia he fononga malimalí. 'Oku 'i ai 'etau lea ko e "malimali loto," 'oku 'uhinga ia ki he fa'ahinga fiefia 'oku ō fakataha mo e nongá 'o 'ikai fu'u 'asi ki tu'a ka 'oku takaloto pe 'o toki e'a he taimi 'o e faingata'a. Ko e nonga ko iá 'oku

makatu'unga ia he 'ilo 'okú tau fe'ao tu'uma'u mo e 'Otuá pea 'okú ne fai 'e Ia hotau fakakaukauá, fakalotolahi'i, pea 'okú ne tofa 'e Ia hotau halá. Ko e nonga eni 'oku talamai 'e Paula he'ene 'Ipiselí 'oku "mama'o he tatae 'o e 'atamai kotoá." Ko e fa'ahinga nonga mo e fiefia tatau na'e talanoa ki ai 'a Sīsū mo e fefine Samēliá 'i he ve'e vaí. Ko e lau 'a Sīsū, "ko e vai te u 'oatú 'e mapunopuna ia 'i loto, pea he'ikai ke ke toe fieinua koe." Ko e a'usia ia 'a Tevita he'ene feohi mo fai 'a e finangalo 'o Sihová, he'ene pehē, "Ko hoku tauhi 'a Sihova 'e 'ikai te u masiva." 'Okú 'ikai foki 'uhinga eni kuo tau hao ai mei he ngaahi faingata'a 'o e hala fonongá, ka ko e 'ilo'ilo pau 'oku fai e fe'ao mo e 'Otuá he taimi kotoa pē 'o ne fakaivia kitautolu ke tau malava 'o fononga he ngaahi tele'a 'o e mamahi, faingata'á, 'io, pea na'a mo ia 'oku malu'aki ai 'a e maté. Ko e 'uhinga ia 'a e ofo pē 'a e fa'u Saamé 'o he'aki 'a e fakafeta'i he kamata'anga 'o e Saame 'o e 'ahó ni he ko e tu'unga 'o 'ene mo'ui, kuo hoko e 'aho kotoa ia ko hono monū'ia'anga ke fai 'a e finangalo 'o hono 'Otuá. 'Okú lolotonga longoa'a hotau fonua háu ni 'i he ngaahi faingata'a fakasōsiale 'oku hoko koe'uhi ko e ngaahi Tu'utu'uni 'a e Pule'angá kuó ne uesia e "totonu faka-Konisitutone" 'a e kakai 'o tatau pe ki he kau nofo fonua 'Amelika mo kinautolu 'oku 'ikai. 'E toki fakamā'opo'opo mai 'e he hisitōliá hono nunu'a 'o e fa'ahinga ta'au 'oku fononga atu ai e Pule'angá he lolotonga ni. Ko e me'a 'oku mahinó, kuo uesia e tokolahi si'otau kāinga, kaungā lotu mo e kaungā mo'ui. Fakafeta'i he fakalotolahi 'oku fai 'e he Fatu Sāmé, "*E 'ikai te ne manavahē koe'uhi ko e ongoongo mai 'o ha kovi. Kuo ma'uma'uluta hono loto he falala ki he 'Eiki! 'Okú poupou hono loto, 'o 'ikai te ne ilifia.*"

‘Ānau, Lotu mo e ‘Aukai: 'E Sīsū to'o 'a e lotó ni 'o'oku, Sila'i ke 'oua hū ha me'a kehe, Ke u mate mo mo'ui pe mo'ou, 'O nofo ai pe si'o ta'emele, 'Emeni.

Pulelulu, Fepueli 4: Lau Folofola – Matiu 5: 13-16.

Ki'i Ama: Matiu 5: 13-14a, "Ko kimoutolú ko e māsima 'o e fonuá: pea ka mole mei he māsima hono koná, 'e fakamāsima 'a e māsima 'e he hā? 'Okú 'ikai kei 'aonga ki ha me'a, ka ke laku pē kitu'a ke molo ai 'a e kakai. Ko kimoutolú ko e maama 'o māmani"

Pou 'Ao: 'Okú tau kei fanongo malanga pe 'ia Sīsū he mo'ungá. Pea hangē pe ko 'etau fanongo malanga 'i hotau ngaahi falelotú, 'oku mahu'inga ke tau fanongo ke tonu ke 'osi ange e malangá 'oku tau ma'u 'a hono 'elitó 'a e momona 'o e fekau 'a e malangá. Na'e mahu'inga kia Sīsū heni ke ne ngāue'aki e fakatātā 'o e masimá mo e māma ke fakamantu ki he kau fanongó 'a e me'a 'oku mahu'inga 'i he'enua ngāue, 'o 'ikai ke fai e fakamamafa he olá (outcomes) ka ko hono taumu'á (purpose). 'Okú mahino 'aupito pe 'a e fatongia 'o e masimá (taste) ko 'ene faka-konokona 'a e me'atokoni ke toe ifo ange. Kapau leva 'oku 'ikai ke toe ma'u hono koná, pea 'oku 'ikai leva ke ne toe lava 'o fai hono fatongiá pea 'oku 'ikai hano toe 'aonga ka ke tanu 'aki pe hala Pule'angá. Ko e maamá 'okú ne fatongia 'aki hono huluhulu mo fakamaama 'a e feitu'u 'oku fakaulo aí. Kapau leva 'oku 'ikai ke "tutu e maama" pea tuku hake ki ha feitu'u 'oku ki'i ma'oma'olungá ke ne lava 'o fai hono fatongiá - huluhulu mo fakamaama, pea ko e toe hā leva hono kehekehe mei he "po'ulí." 'Okú uki heni 'e Sīsū 'ene kau Akó fakataha mo kitautolu 'i hotau kuongá ni ke tau hoko ko e "masima" mo e "maama" 'o māmani. 'Okú 'ikai ko ha fekau faingofua eni kae fakafeta'i he 'oku tau kau ki he Lotu Faka-Kalisitiané, ko e Sino 'oku mo'ui, he ko e Sino-Hā-Mai ia 'o Kalaisi 'i māmani. 'Okú 'ātakai'i kitautolu 'e he fu'u kau fakamo'oni tokolahi. Na'e kamata pe meiate kinautolu na'e "Taka 'i lalo hakanga" 'ia Sīsū pea tu'uholoaki mai he ngaahi kuongá 'o a'u mai ki onopōni. Na'e lave māfana ki he loto mo e loto 'a e uki na'e fai 'e Kalaisi pea loto lahi ai e lotosi'i pea to'a ai pe mo e "vaipaló" 'o fakama'u hifo 'enau tu'ú 'o nau hoko ko e "māsima" mo e "maama" 'o māmani. 'Okú tau takitaha pe e "māsima" mo e "maama", ko e helo he fāмили, Siasi, fonua mo e Pule'angá, na'á ne fakato'ongamo'ui'i 'a e "maamá" mo e "māsima" 'o tau toloto monū'ia ai peá ne faka'ai'ai ke tau tulituli, 'i he tokoni mai 'a e Laumālie Mā'oni'oni, ke tau hoko ko e "maama" mo e "māsima" kiate kinautolu 'oku tau feohi. 'Okú lolotonga longoa'a 'a e fonua háu ni 'i hono fakapōngi 'e he ICE 'a Alex Prettí 'i Minneapolis 'i he faka'osinga 'o Sānualí. Mahalo kapau na ko ha taha mei ha fonua kehe (undocumented) 'e 'ikai ke fu'u lahi e longoa'á, ka ko e toko 2 hake pe eni 'i Sānuali, pea ko e ongo 'Amelika pe (citizen) kuo fakapōngi pe 'e he kau ngāue 'a e Pule'anga (ICE). 'Okú fehu'ia 'e he tokolahi 'a e founa ngāue 'a e ICE pea mo hono 'ata ki tu'a ki he kakai. 'Okú kehe 'a e fakamatala 'a e Pule'angá mei he me'a 'oku tau mamata ki ai 'i he vitio. Ko e tu'unga fakaloloma ia ka a'u ki ha taimi kuo 'ikai ke toe falala'anga ai e Pule'angá. Mahu'inga ke tau toe fanongo ke ongo'i: "*Ko kimoutolú ko e māsima 'o e fonuá: pea ka mole mei he māsima hono koná ... Ko kimoutolú ko e maama 'o māmani: ko e kolo 'oku tu'u 'i ha fūnga mo'unga 'oku 'ikai te ne lava ke puli.*" Tau kau fakataha pe 'i hono hapai hotau kau Taki fakapolitikálé ke nau hoko ko e "maama" mo e "masima" ki he ki he kakai kotoa pē.

‘Ānau, Lotu mo e ‘Aukai: Ko hoku maama'anga koe Sīsū é, He la'ā 'o hoku laumālie Sīsū é, Neongo 'ete po'ulia he langi 'ao'aofia, Te u maama pe ka ta 'i ai, Sīsū e!

Tu'apulelulu, Fepueli 5: Lau Folofola – 1 Kolinito 2: 1-16.

Ki'i Ama: 1 Kolinito 2: 7, “He ko e poto ‘oku mau talá, ko e poto fufū ia ‘o e ‘Otuá. Ko e poto ia na’e finangalo ‘a e ‘Otuá ke fakakoloa ‘aki kitautolu, te’eki ai ke fakatupu ‘a māmaní.”

Pou ‘Ao: ‘Oku tau kei fononga pe ‘i he Fa’ahita’u ‘o e ‘Epifaní mo e Fakahā’anga ‘o e ‘Otuá ki māmaní, ‘i he Maamá. ‘Oku fatongia ‘aki ‘e he maama hono huluhulu mo fakamaama e feitu’u ‘oku ulo aí. ‘I he taimi tatau, ko ‘ene fu’u lahi ‘a e maamá pea ‘oku popongi leva ‘o ‘ikai lava ha sio lelei. Ko e talanoa ia ‘o hono Ui ‘o Paula he hala ki Tamasikusí hono “kuihi” ia ‘e he maama ‘a e ‘Otuá. Ko e maama ai pe ko iá kuó ne fakafonu hono lotó pea mo hono ‘atamaí. Ko e taimi na’e fakavetevete ai ia mei he po’uli hono fofongá (kui), na’á ne toloto monū’ia ‘i he ivi pea mo e mafai mei he Laumālie Mā’oni’oni ke ne muimui’i ‘a Sīsū he hala na’e tau he mate pe mo’ui. ‘Oku feinga a Paula he lēsoni ‘o e ‘ahó ni ke ne fakafaikehekehe’i ‘a e poto faka-e-māmani ko ení pea mo e poto faka’Otuá. Ko e me’a kotoa pē na’á ne malanga’aki na’e ‘ikai ke fai ‘aki ia ‘a e poto faka-e-māmani ko ení ke aoao lea mamafa mo fakapoto pe fakaoloolo, ka na’e fai ‘aki ia ‘a e ivi, mafai pea mo e poto faka’Otuá, ‘o malanga’i ‘a Kalaisi na’e kalusefai. Ko e mo’oni’i me’a ia ‘oku ‘ikai tali ai ‘e he kau poto faka-e-māmani ko ení ‘a e Ongoongolelei ‘o Kalaisi koe’uhi pē ko hono kalusefai. ‘I he taimi tatau, ‘oku hoko ‘a e kalusefai ‘o Kalaisi ko e uho ia pea mo e Kalauni Siueli ‘o e tala’Otuá ‘a Paulá. ‘Oku ‘ikai mo ha toe Kōsipeli pe Ongoongolelei, ka ko hono kalusefai ‘o Kalaisi koe’uhi ko ‘etau ngaahi angahalá pea mo hotau fakalaloa. Ko e ongoongokovi ‘o e pēkia ‘a Kalaisi he kolosi ki he kau poto faka-e-māmani ko ení, ‘oku hoko ia ko e Ongoongolelei kiate kinautolu ‘oku nau ma’u ‘a e poto faka’Otuá. Ko e Ki’i Ama ‘o e ‘ahó ni, ‘oku fakahaa’i ai ‘e Paula ‘a e poto ‘oku nau malanga’i ko e poto na’e ‘i he kamata’angá pea na’e fufū mei he ni’ihi kae fakae’a kiate kinautolu pē ‘oku fā’ofale ai ‘a e Laumālie. Ko e ngaahi me’a fakalaumālie ‘oku ‘ilo fakalaumālie pē. ‘Oku tau fa’a ma’u faingamālie he taimi ni’ihi ke fai ai ha tokoni ki ha ni’ihi ‘oku faingata’a’ia lahi koe’uhi ko e mole ha ‘ofa’anga, pe mole ‘a e ngāue na’e fakafalala ai ‘enau ki’i nofó, fānau pe makapuna ‘oku mo’ua ‘i ha faingata’a fakaesino ‘oku hangehangē ka ‘ikai toe taulangá. ‘Oku tau fa’a feinga ke fakamānavahake kinautolu ‘aki ha ngaahi tokoni fakapoto ‘oku lelei ki he fanongó ka ‘i he taimi tatau ‘oku tau ‘ilo’ilo pau ‘oku ‘ikai ha me’a te tau ‘ilo felāve’i mo e tu’unga ‘oku ‘i ai ‘a e me’a ‘oku hokó. Ko e taimi pēhē, ‘e mahu’inga ke tau tu’u fakataha mo Paula, ‘o faka’ata’atā hotau lotó mo hotau laumālie ka tau tuku ki he Laumālie Mā’oni’oni ke ne tatala ‘a e poto faka’Otuá kiate kinautolu ‘oku lolotonga fehanganagai mo e faingata’á. ‘Oku faingofua hono lea ‘akí kae faingata’a hono faí he ‘oku ‘amanaki mai ‘a kinautolu ‘oku fiema’u tokoni ke tau fai honau fakafiemālie’i ‘i he lea mo e ngāue. Te tau ‘ohovale kotoa pē ‘i he taimi ‘oku ngāue mai ai ‘a e Laumālie Mā’oni’oni ke fai hotau hakeaki’i mo fakamānavahake ‘i he’etau lava ‘o faka’atā ‘a hotau ngata’angá ke me’angāue ‘aki ‘e he ‘Otuá.

‘Ānau, Lotu mo e ‘Aukai: Fakafonu kinautolu ‘aki ho’o potó ‘e ‘Otuá, ke mau lava ‘o malanga’i mo talaki ‘a e Ongoongolelei ‘o Sīsū kalusefai ‘i he taimi kotoa pē, ki he kakai kotoa pē, he feitu’u kotoa pē. ‘Emeni.

Falaite, Fepueli 6: Lau Folofola – ‘Aisea 58: 9b-12.

Ki’i Ama: ‘Aisea 58: 9b-10, “Kapau te ke hiki mei ho lotolotongá ‘a e ‘ioké, ‘a e tuhu manukí, ‘a e lea kovi. Pea ke tauhi ‘a e fiekaia’aki ho māmaná, peá ke fakatopono ‘a e loto kuo mafasiá; pea ‘e toki hopo ho’o maamá ‘i he po’ulí, pea ko ho kāupo’uli ‘e hangē ko e ho’atā.”

Pou ‘Ao: ‘Oku tau toe hokoatu pe he Lēsoni na’a tau kamata’aki ‘a e uiké. Na’a tau tokanga ki hono fakamanatu mai ‘e he Palōfitá ‘a e mahu’inga ‘o hono ngāue’i ‘o e taumu’á. ‘Oku mo’oni mo mahu’inga ange ‘a e ngāue ‘i he leá pea mo ha toe me’a. ‘Oku tau fa’a fiu feinga ‘i he aoao lea ke fakamatala’i ha ngāue ka ko e taimi ‘oku tau fai ai e ngāue pea ‘oku mahino ange ia ‘i he lea na’e mei fakamatala’i ‘akí. Te tau tipeiti’i ‘a e ngaahi founa ki hono fakahoko ‘o ha ngāue he lotofale ‘o e Siasí ‘o tatau pe mo e fāmili pe ko e Pule’angá, pea ko hono fakamā’opo’opo tukú ‘e toki fai kotoa ia ‘i ha lava ‘a e ngāué. Ko e ngāue lahi kotoa pe ‘oku mahu’inga ia ke fokotu’utu’u mo palani ke maau pea toki fai. Ko e me’a mu’omu’a ia mo ‘uluakí ko e palani ka ‘oku tau fa’a mo’unofoa ai pe hono talanoa’i ‘o e palaní ‘o ‘ikai ke tau a’u ki hono fakakakato ‘o e taumu’a na’e ‘uhinga ki ai e palaní. Ko hotau Ki’i Ama ki he ‘ahó ni ‘oku meimeí natula tatau mo e “Ngaahi Monū’ia” na’e malanga’aki ‘e Sīsū ‘i he mo’ungá. ‘Oku maau e palaní, ko e toe eni hono ngāue’i. ‘Oku hanga ‘e he fō’i lea “Kapau” ‘i hotau Ki’i Amá ‘o talateu’i mai ‘a e “Monū’ia” ‘e ma’u hono fai e Fekāú. ‘Oku Tolu e me’a ‘oku tala fakapatonu mai ke fai. ‘Uluakí, ko hono to’o (hiki) ‘a e ‘ioke – fakatau’atāina’i kinautolu ‘oku kei nofo hopoate ‘i he sosāietí. Uá, ke ta’ofi ‘a e tau’aki tuhú (manukí), fetukuaki’i ‘akí mo e tau’aki tuli tonuhiá. Faka’osí, ke ta’ofi ‘a hono lau’ikovi’i ‘o e kaungá fonongá. Na’e toe ta’ota’o atu ai pe ‘e he Palōfitá ‘a e kongá hono Ua ‘o e me’a ‘oku tokanga mai e ‘Otuá ke nau faí – fafanga

e fiekaia pea fakanonga ‘a e kau loto mafasia. Na’e ‘ikai ke ngata pe he fiema’u ke fafanga ‘a e kau fiekaia kae huluatu ‘a honau fafanga fakalaumalié. Ko e taimi ‘oku tau fakahoa ai ‘a e Fekau ‘o e Ki’i Amá mo e tu’unga fakapolitikale ‘oku ‘i ai hotau fonua haú ni he ngaahi ‘ahó ni, pea ‘oku tau fakamo’oni kotoa pe, ki he “Mo’oni” ‘o e Folofola ‘a e ‘Otuá. Ko e me’a na’e mo’oni he taimi ‘o e Palōfitá mo ‘Isilelí ‘oku kei mo’oni pe ‘i hotau kuongá ni. Na’e ‘i ai ‘a e taimi na’e ‘i he tumutumu ai ‘a ‘Ameliká ni ‘i hono tali ‘o e kakai ‘oku talanoa ki ai ‘a ‘Aiseá. ‘Oku kei tu’ú ni ‘a e *Lady of Liberty* mo ‘ene maamá he matātahi ‘o Niu ‘Ioaké ko e faka’ilonga ‘o hono talitali lelei ‘o kinautolu ‘oku mafasia, fiekaia, tukuhāusia mo faingata’a’iá ke nau ha’u he ‘oku talitali lelei kinautolu ‘e ‘Amelika. Ka ‘i he ‘ahó ni, ‘oku ‘ikai ke ngata pe hono fakaehaua ‘o e “kehé” ka kuo a’u pe ‘o fakapōngi mo e kakai totonu pe ‘o e fonua (*citizen*). Tau kau fakataha pe mo hotau kau Taki Lotú (*UMC*) ‘i he fai hotau lelei tahá ke tokoni’i kinautolu ‘oku fiema’u tokoni pea tuku ki he ‘Otuá ke ne toki fai hono fakakakató, “*pea ‘e toki hopo ho’o maamá ‘i he po’ulí, pea ko ho kāupo’ulí ‘e hangē ko e ho’atā.*”

‘Ānau, Lotu mo e ‘Aukai: Tokoni mai ‘Eiki ‘o fai homau fakalotolahi’i ke mau lava ‘o fai ho finangalo neongo ‘ene faingata’a mo e ongoonga’a ‘a e kuongá. ‘Emeni.

Tokonaki, Fepueli 7: Lau Folofola – Matiu 5: 13-20.

Ki’i Ama: Matiu 5: 20, “Mou fanongo lelei mai kiate au: Kapau ‘e ‘ikai ke sai ange ho’omou tauhi ‘a e lao ‘a e ‘Otuá ‘i he kau faiako laó mo e kau Fālesí, pea he ‘ikai ‘aupito te mou teitei hū ki he Pule’anga ‘o Hēvani.”

Pou ‘Ao: ‘Oku tau toe foki pe ki he mo’ungá ‘o hokoatu ‘etau fanongo he malanga mālie ‘a Sīsū. Mahu’inga ke tau ki’i pine hifo ‘o vakavakai lelei mo fakafanongo ki he folofola ‘oku fai ‘e Sīsū ‘i he Ki’i Ama ‘o e ‘ahó ni he ‘oku “loloto pea ‘oku ‘au” ‘o hangē ko e lau ‘a e Punaké. Ko e kau Faifekau eni ‘o e taimi ‘o Sīsū ‘i he Lotu faka-Siú ‘oku fakatātā ki ai ‘a e tauhi Laó. ‘Oku sio ‘olunga ‘a e taha kotoa pē ‘i he Lotú ki he kau Faiako laó mo e kau Fālesí. Ko e kakai eni na’e tuki mo nonofo ki ai ‘a hono faka’uhinga’i ‘o e Laó ‘i he Lotu Faka-Siú. Ko e Tukufakaholú, ‘oku nau fotu kinautolu mo mahiki hake ‘i he toenga ‘o e fonua koe’uhi pe ko ‘enau “mataotao” ‘i hono faka’uhinga’i mo fakamatala’i ‘o e Laó. ‘Oku ala falala’anga honau fatongiá he ‘oku fai poupoua ‘e he tapa kotoa pe ‘o e fa’unga mo e Tōtō’onga Lotu ‘o e Lotu faka-Siú (Temipale). ‘Oku fu’u mā’olunga faufaua ‘a e tu’unga fakalotu ‘o e kau Faiako laó ‘i hono fakahoa ki he toenga ‘o e kakai na’e fanongo he malanga ‘a Sīsū. Pea neongo ai ‘a e hangē ‘oku ‘ikai ke malava, ka ‘oku tala fakapatonu mai ‘e Sīsū ‘i hotau Ki’i Amá, kapau ‘e ‘ikai ke sai ange ho’omou tauhi laó he fu’u kau “mā’olungá” ni, pea ko e mo’oni ‘e ‘ikai ke mou lava kimoutolu ‘o hū ki Hēvani. Na’e ‘afio’i lelei pe ‘e Sīsū ‘a e founa na’e fai ‘aki ‘e he kau Faiako laó hono tauhi ‘o e laó. Na’e mo’oni kiate kinautolu ‘a e lau ‘a e veesi 48, “*Ko ia ke mou haohaoa ‘o hangē ko e haohaoa ‘a ho’omou Tamai fakahēvani.*” Mālō ‘aupito pē ‘a hono tauhi ‘o e laó, fa’a lotú mo e ‘aukaí pea mo e ngāue lelei kotoa pē ‘oku tau lava ‘o faí, ka ‘oku ‘ikai ko ia ‘okú ne fai hotau fakahaohaoa’i. Ko e mo’oni ‘e ‘ikai ha taha ia ‘e tatau mo e kau faiako laó mo e Fālesí ‘i hono tauhi ‘o e laó, ka ‘oku ‘ikai ke lava ‘e he tauhi laó pea mo hono fakakakato ‘o e ngaahi ouau fakalotú ke fai honau fakahaohaoa’i. Ko hotau fakahaohaoa’i ‘oku fai toko taha pē ia ‘e Sīsū Kalaisi ‘aki ‘a ‘ene to’o ‘etau angahalá ‘o ne pēkia mo ia he kolosí ka tau mo’ui ai. Ko Sīsū ‘okú ne tauhi mo fakakakato ‘a e laó ma’atautolú. ‘E ‘ikai ke tau lava ‘o fai hotau fakahaohaoa’i he ‘oku ‘ikai ha’atau me’ime’i haoahaoa. ‘Oku mo’oni e lau ‘a e Himi ‘a Molitoni 587: 2, “Ko hai ‘e ‘ilo ‘ene hē? Puli ‘a kita ‘ia kita. Lau ‘oku ‘ikai ha’ate mele, Hā pē ki langi ko e kilia.” Ko Kalaisi toko taha pē ‘okú ne ma’u ‘a e haohaoa ‘oku fiema’u ‘e he Tamai. Ko Kalaisi toko taha pē ‘okú ne lava ‘o fai hotau fakatonuhia’i. Ko Sīsū toko taha pē ‘okú ne fai hotau fakahaofi mo hotau fakamo’uí. Tauange ke tau kau fakataha pe mo e Kaveinga ‘o e mahina fo’ou ni, “Tataki ‘e he Maama ‘a e ‘Otuá: Sivisivi’i mo Fakatonutonu ‘etau tauhi kiate Iá.”

‘Ānau, Lotu mo e ‘Aukai: Si’i nofo haohaoa, Hoku loto kuo to’oa, Ho’o hā masani mai. Ko e nofo ta’e ha ilifia, Kae fonu ‘i he fiefia, ko e fiefia ‘o langi. ‘Emeni.

Sāpate, Fepueli 8: *Sāpate 5 Hili ‘a e ‘Epifanī. (Lanumata).*

Lesoni: ‘Aisea 58; Saame 112:1-10; 1 Kolinito 2:1-12; Matiu 5:13-20.

Mōnite, Fepueli 9: Lau Folofola – ‘Ekisoto 24: 12-14.

Ki’i Ama: ‘Ekisoto 24: 12-13, “Pea folofola ‘a Sihova kia Mōse, “Alu hake kiate au ki he mo’ungá, ‘o nofo ai, pea te u ‘atu kiate koe ‘a e ngaahi makatohi, mo e lao mo e ngaahi tu’utu’uni ‘a ia kuó u tohi ai; koe’uhi ke ke ako ia kiate kinautolu.’ Pea tu’u hake ‘a Mōse mo hono tauhi ko Siosiu: pea ‘alu hake ‘a Mōse ki he mo’unga ‘o ‘Elohimí.”

Pou 'Ao: 'Oku tau fakafeta'i he 'etau a'u mai ki he uike faka'osi 'o e Fa'ahita'u 'Epifani' pea mo e teu ki he Sāpate 'o e Hā Fakakehé. 'Oku kamata 'etau lau Folofolá 'i he fononga 'a Mōsesē ki Mo'unga Sainai, pea mo hono ouau toputapú. Ko e taha 'o e ngaahi huafa 'o e 'Otua ko e "Sātai" (*El Shaddai*), 'a ia 'oku 'uhinga ko e "'Otua 'o e Mo'ungá." Pea talu mei he Fuakava Motu'á mo e kamata'anga 'o taimi, mo e mahino 'a e hoko 'a e mo'ungá ko e feitu'u 'oku vāofi makehe ange ai 'a e tangatá mo e 'Otua, pea fa'a malava ai 'a e fetaulaki mo e fetu'utaki mo e 'Otua. Na'e 'alu hake 'a 'Epalahame 'i he mo'unga 'i Molaiá ke feilaulau 'i ai hono foha ko 'Aisaké (Senesi 22). Na'e hoko 'a Mo'unga Sainai ko e fetaulaki'anga 'o Mōsesē mo e 'Otua, 'o kau ai 'a e lēsoni 'o e 'ahó ni. Pea ko e mo'unga tatau pe, 'a ia na'e toe 'iloa ko Mo'unga Hōlepi, na'e ongona ai 'e 'Ilaisiá 'a e le'o 'o e 'Otua. Ko e Mo'unga ko Nipó na'e sio ai 'a Mōsesē ki he katoa 'o e ngaahi fonua 'o e kovinanite 'a e 'Otua mo e 'Epalahamé, pea toki tokoto 'a Mōsesē 'o pekia. Talu ai 'a hono fakamahu'inga 'i 'i he tala 'o e Tuí mo e Lotú (*faith literature*) 'a e mo'ungá ko e feitu'u 'oku hangehangē 'oku tatala ai 'a e fakangatangata 'o māmani, kae fakafetaulaki ai 'a māmani mo Hēvani, pea hā sino ai 'a e 'Otua. 'Oku talanoa hotau Ki'i Amá ki he kaka 'a Mōsesē 'i he mo'ungá ko 'ene talangofua ki he fekau na'e fai kiate iá. 'Oku fonu 'a māmani 'i he kakai 'oku nau mo'ui 'aki 'a e "kaka mo'ungá," ke a'usia 'a e lāngilangi mo e nāunau 'ia 'o e tumutumu 'o e mo'ungá. Ko e uki ia 'oku fai 'e he tala 'o e kumi ki he lelei fakafo'ituitui (*self-help*) pea mo e lelei 'o e hikihiki tu'unga 'o e mo'ui ni. Pea ko hai te ne fakahala 'i 'a e vivili 'a e mo'ui ke ma'u ha kongá si'i 'o e nāunau 'o e fakalakalaká mo e mo'ui na'a tau nofo 'o faka'amuá. Ka'oku mahu'inga ke tau a'u ki he fehu'i 'o e "WHY" pe ko e hā 'a e 'uhinga 'oku tau fai ai 'a e me'a 'oku tau fai. Ko e a'usia ia 'a e taha 'o e kau helo 'o e Filōsefa 'o Kalisi, "ko ha mo'ui 'oku 'ikai ke fakatokangame'a, ko e mo'ui ia 'oku ta'e aonga." (*An unexamined life is not worth living*). Pea ko e a'usia ia 'a Molitoni 'i he Himi 582:1, "'Oku mau 'ilo 'Eiki, Ko homau nafá é. Ke hanganaki sivi, He taimi fua pe. Na'a mo ho'o fanga pele, 'E 'ikai si'i lākai, Kae fai pe honau 'eke. 'O tō 'a e 'ahi'ahi." Ko e a'usia ai pe ko ia 'oku tau kau fakataha ai mo e Kaveinga 'o e mahina ko 'eni, "Tataki 'e he Maama 'a e 'Otua: Sivisivi' i mo Fakatonutonu 'etau tauhi kiate Iá," pea 'e toki tonu ai 'a 'etau mo'ui, pe ko e kaka 'i he mo'ungá pe hifo 'i ha tele'a, kehe pe 'oku tau fai 'i he talangofua ki he 'Otua Māfimaifi.

'Ānau, Lotu mo e 'Aukai: Kehe ke ofi pe, Kiate koe. Ko 'eku holi e, mo 'eku to'e. Neongo ko e hala, fou 'i he faingata'a. Ha me'a pe te u lava, ke ma'u ai koe. 'Emeni.

Tūsute, Fepueli 10: Lau Folofola – 'Ekisoto 24: 14-18.

Ki'i Ama: 'Ekisoto 24: 18a, "Pea hū 'a Mōsesē ki he loto 'aó, 'o ne 'alu hake ki he mo'ungá"

Pou 'Ao: 'Oku tau toe hokoatu pe he Lēsoni na'a tau fakalaulauloto ai 'aneafi. 'Oku fakaholo mamata pea toe fakamanavahē 'a e ngaahi me'a na'e hoko he tumutumu 'o e mo'ungá: 'ufi'ufi 'e he ngaahi 'aó 'a e mo'ungá, ongo 'a e le'o mei he loto 'aó, pea fotufotuaki 'a e kolōlia 'o Sihová 'o hangē ha afi faka'auhá. Pea na'e fe'unga pe 'a e mo'utāfū'ua 'a Mōsesē he ko 'ene fe'iloaki mo e Hau 'o e ngaahi Haú. 'Oku kei mahu'inga pe mo 'aonga 'a e talanoá ni ki he pilikimi 'oku tau fai 'i he kuongá ni. 'Oku 'i ai pe 'a e ngaahi mo'uga kuo ui kitautolu ke tau kaka ai. Pea mo'oni 'a e lea 'a e kau helohelo 'o e kaka mo'ungá, "'I he faiva 'o e kaka mo'ungá, 'oku 'ikai ko 'etau ikuna 'i 'a e mo'ungá, ka ko 'etau ikuna 'i hotau lotó." (*Being a mountaineer makes us aware that it is not the mountain we conquer but ourselves*). 'Oku pehē pē 'a e ui 'oku fai 'e he 'Otua kiate kitautolú, ko e ui ke tau kaka 'i he ngaahi mo'unga 'o e mo'ui, 'o 'ikai ke mahu'inga 'a e mo'ungá ia, 'a hono fotungá, lahí, mo e hā fua pe 'a e ngaahi me'a felāve'i mo e mo'ungá. Ko e me'a 'oku mahu'inga ko 'etau feinga ke tau lava 'o ikuna 'i hotau lotó. 'Oku tau takitaha pe 'a e mo'unga ke 'ahi'ahi ke kaka ai pea ko hono fakakoloá he 'oku 'omi pe mo e ivi fe'unga ke fai 'aki. Ko e taimi kotoa pe na'e ui e 'Otua kia Mōsesē, na'a ne tuku kotoa 'ene ngāue na'e faí kae tulituli ke a'u ki he 'Otua ki he tumutumu'i mo'ungí. Ko e me'a na'e fai kia Mōsesē 'oku kei faí ni pe kiate kitautolu 'i hotau kuongá ni. Ko e ui ke tuku 'a e me'a 'oku tau anga ki aí, 'a e me'a 'oku faingofuá, 'a e me'a 'oku ma'ama'á, kae kakapa atu ke kaka 'i he mo'ungá. Pe ko e ui ki ha ngāue makehe ke ke fai, pe ko e fiema'u ke ke fakamolemole, ke ke fai 'ofa ki ha taha 'oku faingata'a ke 'ofa ki ai, pe ko e li'aki ha me'a 'oku 'ikai ke fe'unga, pe ko e mo'unga 'o e li'ekina mo e māvae mo ha 'ofa'anga, pe ko e hā pe ha me'a he mo'ui kuo hopo hake 'o hangē ko 'Evalessi. Ko e uki 'oku faí, ke hū ki he loto "'aó." 'Io, neongo 'a 'ene fakamanavahē, ka ko e angí ai pe ia – "puna ki he ta'e'iloá," he 'okú ne 'i ai ke fakafetaulaki 'a e loto 'okú ne malava ke li'aki 'a hono kitá, ilifiá mo 'ene tala'á. 'Io, 'a e loto 'oku tuí. 'Oua te tau fiu 'i he kaka 'i he ngaahi mo'unga 'o e mo'ui, he 'oku tau fononga mo e Pou 'Ao mo e Pou Maama 'o e "tumutumu 'o e mo'ungá," ki he Fonua 'o e Tala'ofá. Ko e fakalotolahi 'a e Toketá, "'Ko e tufunga 'a e 'Otua, Ko hotau ngaohi 'eni. 'Oku tuai 'a e ngāue ia; Ko e 'ai ke fu'u lelei. 'Oku hā fakakonga pē koe 'uhi ke tau tui. Ko hono 'ā'ālonga pē, 'E hā kotoa 'amui." Tau kau fakataha pe mo e Kaveinga e mahina, "Tataki 'e he

Maama ‘a e ‘Otuá: Sivitiesivi’i mo Fakatonutonu ‘etau tauhi kiate Iá” he ‘oku tau fetaulaki tonu ai mo e māfimaifi ‘o Sihová.

‘Ānau, Lotu mo e ‘Aukai: ‘E ‘Otuá na ‘a ke ‘afio ‘i Mo‘unga Sainai, pea ‘okú ke kei ‘afio ‘i ho taloni ‘i he kuonga kotoa pe, tokoni ‘i au ke ‘oua na ‘a ‘i ai ha taimi, ‘e mole ai ‘a ‘eku ‘amanakí ‘i he fononga ‘angá ni.

Pulelulu - Fepueli 11: Lau Folofola – Saame 99: 1-9.

Ki’i Ama: Saame 99: 1-3, “KUO Tu’i ‘a Sihova; ‘oku tete ‘a e ngaahi fa‘ahingá. ‘Okú ne ‘afioa ‘a e ongo Selupimí; ‘oku ngalulululu ‘a e fonuá. Ko Sihova ‘i Saione ‘oku mā‘olungá; Pea ko e fotu ia ‘i he ngaahi kakai kotoa. Ke nau fakamālō‘ia ho huafa lahi mo ngeiá: Ko e tāpuhā Ia.”

Pou ‘Ao: ‘Oku fakahingoa ‘e he kau Liliu Tohitapú ‘a e Sāme ‘o e ‘ahó ni ko e Saame Faka-Tu’i (*Royal / Enthronement Psalm*). Ko e tefito ‘i ‘ulungaanga ‘o e ngaahi Saame ko ‘ení, ko hono hiki ‘a e ‘Otuá, ko e Tu’i, ‘o fakamamafa ‘i ‘a ‘ene pule aoniú ‘i he tangatá mo e fefinē pea mo e māmani na ‘á ne fakatupú. ‘Oku mahino ‘aupito ange kiate kitautolu ‘oku muimui kia Sīsū mo e lotu faka-Kalisitiané, ‘a e tu‘unga Tu’i ‘o Sihová koe‘uhi pe he na‘a tau tupu hake he fonua tauhi Tu’i. Pea neongo ‘a ‘etau nofo mulí ka ‘oku ‘ikai ke mole ai ‘a e ngaahi ‘ulungaanga na ‘e tā faka‘ingo‘ingo kiate kitautolu ‘i he tauhi ki he Hou‘eiki pea mo e Tu’i. ‘Oku ou faka‘amu ke tau siofi ‘a e ngaahi ‘uhinga ‘oku ‘ai ‘e he Fatu Ta‘anga kia Sihová ‘o hangē ko e lea, “Ko e Tapuhā Ia ... *for it is holy.*” Ko e ‘uhinga ‘o e Tapuhā, ko e me‘a ‘oku hiliō pe mahulu atu ia he me‘a kotoa he ‘univeesí mo ia ‘oku ala a‘usia ‘e hotau ‘atamai fakangatangátá. ‘Oku kāinga mo ia ‘a e lea, “Ta‘emahakulea”, pea ‘oku tonu ‘aupito pe hono ngaue‘aki ke fakalangilangi’i e ‘Otuá he ‘oku pehē tofu pe. Ko e feitu‘u ‘e tolu ‘oku ‘asi ai ‘a e Tapuhā he ta‘angá ni. ‘I he veesi 1-3, ‘oku talanoa ki he tete ‘a e kakai, pea ngalulu ‘a māmani he ‘ao ‘o Sihová ke fakamahino ‘oku nau ‘i he ‘ao ‘o e Aoniú mo e fakaleveleva ‘o e ‘univeesí. Tānaki atu mo e ‘ave kitautolu ki he kohu ‘o e Mo‘unga Sainai pea mo e Hā Fakakehe ‘a e fofonga ‘o Mōsesé. ‘I he tu‘unga ko ‘ení, ‘oku ‘ikai ha toe ui ia ka ko e tala ‘e he fatu Saamé ki he kakai kotoa ke fakamālō‘ia ‘a e huafa lahi ‘o Sihová, he ko e Tapuhā ia! ‘I he konga hono uá, ‘oku fakamahino ‘e he veesi 4 mo e 5, ko e Tu’i Aoniú ‘oku “manako ki he faitotonú mo e mo‘oní,” pea ‘okú ne taau mo e Tapuhā. Ko hono konga tolú, ‘oku ‘asi he veesi 6-9, ko ‘ene fie kaungā ngāue mo e fa‘ahinga ‘o e tangatá ‘o fou he fetauhi‘aki mā‘oní‘oní hangē ko ia ko Mōsesé, ‘Elone, mo Samiuelá. Ko e ni‘ihi ne nau tangi kia Sihova peá ne fanongoa ‘enau tāuto‘é (v.7). Koe‘uhi ko ‘ene ‘ofa tu‘uma‘u, ki he kakai kotoa, ‘oku malava ia ke ne kaungā ngāue mo koe pea mo au neongo ‘etau tōnouns. ‘Oku uki kitautolu ‘e he Kaveinga ‘o e mahiná, “Tataki ‘e he Maama ‘a e ‘Otuá: Sivitiesivi’i mo Fakatonutonu ‘etau tauhi kiate Iá.” Ko e tāpuaki ia ‘o ‘etau ma‘u ha ‘Otuá ‘oku fotu mo mahiki hake he me‘a kotoa he ‘univeesí mo ia ‘oku ‘ikai malava ‘e hotau ‘atamai ke a‘usiá. Ko e tauhi ‘o e ‘taloni ‘o e ‘Otuá mo‘ui, ‘o tatau ‘i he faingofua mo e faingata‘a, kuo pau ke fotu mo mahiki hake, ‘o hangē ko e lau hotau lēsoní, “Fakahikihiki’i ‘a Sihova, ko hotau ‘Otuá, ... He ko Sihova ko hotau ‘Otuá, ko e Tapuhā Ia.”

‘Ānau, Lotu mo e ‘Aukai: ‘E Sīsū, ko e Taukei ‘i he toafá ni, ‘E faka‘ilo ‘a e lelei ke u laka atu ai, ‘Emeni.

Tu‘apulelulu, Fepueli 12: Lau Folofola – 2 Pita 1: 16-21.

Ki’i Ama: 2 Pita 1: 19, “Kae‘uma‘ā ‘oku tau ma‘u ‘a e folofola palōfisaí, ‘a ia ko e me‘a ‘oku pau ange; pea ‘oku mālō ho‘omou fakatokanga ki aí, he ‘oku hangē ko ha maama ‘oku ulo ‘i ha potu maomaonganoá, kae‘oua ke mafoa ‘a e atá, pea hopo ‘a e fetu‘u ‘ahó ‘i homou lotó.”

Pou ‘Ao: ‘I he‘ene a‘u mai ki hono faka‘osi‘osi ‘o e ki‘i ngāue ni, ‘oku kei le‘o lahi pe hono tālanga‘i ‘o hono fakapōngi ‘e he ongo ICE ‘e toko ua ‘i Minneapolis ‘a e neesi ICU ko Alex Pretti. Ko hono faingata‘á he ‘oku ‘ikai ke ma‘u ha mo‘oní. ‘E toki fakamā‘opo‘opo mai ia ‘amui ange ‘oka fai hano fakatoto‘i, ka ‘i he ‘aho pe na‘e hoko ai e fakapō, kuo tala mei he Sekelitali ‘o e DHS ko e tamá ni, ko e “tautoitoi ‘Amelika” (*domestic terrorist*) pea na‘e taumu‘a ‘ene ‘i he Laka Fakahāhā ke ne fai e kovi lahi taha te ne ala lavá ki he kau ICE (*maximum damage*). Ko hono pango ‘o e fakamatala mei he Pule‘angá he ‘oku kehekehe ia mei he vitió pea ‘oku toe fai e feinga ke fakatonutonu ‘a e ‘uluaki fakamatalá. Ko e tu‘unga ia kuo a‘u ki ai hotau fonua haú ni pea ‘oku ‘ange‘ange hono tala ‘e he Pule‘angá ‘oku fake news (*ongoongo loi*) ‘a e kau faiongoongó, ‘i hono tukuaki‘i ‘e he tokolahi ‘oku fake news ‘a e Pule‘angá. Ko e tefito ‘i kaveinga ‘o e Tohi hono ua ‘a Pitá, ko hono fakafepaki‘i ‘o e ngāue ‘a e kau akonaki hala ne nau fakaikai‘i ‘a e ngaahi mo‘oní ‘o e Lotu faka-Kalisitiané. ‘Oku fakafuofua na‘e fai ‘a e tohi ni hili ‘a e pēkia ‘a Pitá, ‘o mahino kuo ‘osi‘a e to‘utangata ne nau sio tonu ki he mo‘ui mo e pēkia ‘a Sīsū. Kuo kamata ke lau ‘e he kau faiaiko halá ko e fananga ‘a e ngaahi akonaki ‘a e kau ‘aposetoló, ‘o tautautefito ki he hā‘ele ‘Anga Ua mai ‘a Sīsū. “Ka ko e kau sio tonu kimautilu.” Ko e fehanganagai ‘o e ongoongo loí (*fake news*), ko e fakamo‘oní‘i sio pau ‘o e me‘a na‘e ‘osi hoko. Ko ia ‘a e talaloto ‘a Pitá, he na‘e kau ‘i he sio tonu ki he Hā

Fakakehe 'a Sīsū. 'Oku tuhu 'a e kau faiako Folofolá ki he taha 'o e tefito 'i 'uhinga 'o e Hā Fakakehé: ko ha visone tō mu'a, 'oku sio ki ha me'a 'oku te'eki ke hoko mai. Pea tā na'e tu'u 'a Pita, Semisi mo Sione 'o sio tonu ki hono fakanofo 'o Sīsū ko e Tu'í, 'o nau ongona 'a e le'ó, *"Ko hoku 'Alo Pelé 'ena, 'a ia kuo toka ki ai 'eku hōifua."* Ko e taípe tonu 'eni 'o e hā'ele hono ua mai 'a Kalaisí. Pea tānaki atu ki ai mo e ngaahi folofola palōfisai 'o e Fuakava Motu'á, *"ko e me'a 'oku pau angé,"* he na'e hoko 'a e ngaahi palōfisai kotoa na'e tuhu kia Sīsū, 'o a'u ki he'ene pēkiá mo 'ene toetu'ú, pea 'e a'u ki ha'ane toe hā'ele mai. Pea uki ai 'e Pita 'a e kau Kalisitiane 'o e 'uluaki senitulí ke tu'u 'enau falalá 'i he Folofolá, *"ko e me'a 'oku pau angé,"* 'o ne tuhu ki he fatongia fakatalutalu 'o e Folofolá talu mei mu'á, ko e *"tūhulu ki he'eku laká, pea mo e maama ki hoku halá."*

'Oku kei 'aonga pe 'a e akonaki 'a Pitá kiate kitautolu 'i ha kuonga kuo lahi ai e "ongoongo loi" pea mo hono lau 'o e loí ko e mo'óní. Neongo 'oku 'iloa eni ko e "Kuonga 'o e 'Ilo Me'á," (*Age of Information*), 'oku mahu'inga pe ke tau 'ilo pea lava 'o fakafaikehekehe 'i 'a e "Mo'oni" mei he "Loi." Tau tali 'a e fakatokanga na'e fai 'e Pita ki he kau Kalisitiane 'o e 'uluaki senitulí, 'o fakafoki 'etau falalá ki he *"me'a 'oku pau angé,"* 'o tuku 'a e Folofolá ke ulu 'i he 'etau mo'uí peá ne huluhulu mo fakamaama hotau halafononga he 'aho kotoa pē.

'Ānau, Lotu mo e 'Aukai: Tuku ke ulu mai ho'o maamá 'e 'Otua 'o fai hoku huluhulú, Peá u fakalaulauloto ai 'i ho'o mā'oni'óní he 'aho kotoa pē 'o 'eku mo'uí. 'Emeni.

Falaite, Fepueli 13: Lau Folofola – Matiu 17: 1-9.

Ki'i Ama: Matiu 17: 5, "Pea lolotonga 'a e kei lea 'a Pitá mo e nga'unu mai ha kongá 'ao huhulu 'o 'ufi'ufi kinautolu, pea ongo mai mei he 'áo ha le'ó 'oku pehē: 'Ko hoku Foha 'ofa'angá ena. 'Oku mātu'aki lelei'ia ai hoku lotó. Mou fakaongo kiate ia!"

Pou 'Ao: Na'e hoko 'a e Hā Fakakehé, ko e tala'anga 'o e tu'unga faka-Mīsaia, pē faka-Tu'i, 'o Sīsū ki he'ene kau akó. Kuo fakalau ke a'u ki he faka'osinga 'o e ngāue 'a Sīsū 'i māmaní. Na'e mahino ki ai hono tufakangá pea mo e hala kuo pau ké ne fou aí, ka na'e puli ki he kau akó, ko ia na'e feinga 'a Sīsū ke fakatoka 'a e 'ilo ko iá kiate kinautolu. Ko e talanoa ia 'o e vahe 16 'o Mātiú: *Ko hai nai 'a e Fanautama 'a Tangatá 'i he lau 'a e kakai? Ko hai au 'i he lau 'amoutolú?* Tangane 'a e tali 'a Pitá, he ko e tali 'a e sio tonu mo e takaofi, *"Ko e MĪSAIA koe, ko e 'ALO 'O E 'OTUA MO'UI."* Liliu ai 'a Pita 'o ui ko e Maká, pea hoko 'a e tali na'á ne fai ko e makatu'unga ke langa ai 'a e Siasí. Pea *"kamata mei he taimi ko iá 'a e fakahā 'e Sīsū ki he'ene kau akó, 'a e pau ké ne 'alu atu ki Selusalema ... pea ke tāmata'i, pea ke fokotu'u hake 'i hono 'aho tolú."* Ka na'e hangē ha kai kape fifisí 'a Pitá 'a e 'ikai ke fie fanongo ki he tala 'e Sīsū 'e tamata'i ia 'e hono ngaahi filí. He neongo na'e tonu 'a 'ene talí, ka na'e kei puli pē kia Pita 'a e 'uhinga totonu 'o e "MĪSAIA." Na'e kei pipiki 'a Pita mo e kau akó ki he fakatonulea 'o e Mīsaia na'e taukave'i 'e he kau Siu 'o e 'aho ko iá: Ko e Helo 'Otuá 'e hoko mai ko e 'Eikitau ké ne kāpiteni 'i he kau tau 'o 'Isilelí 'o ne ikuna 'i 'a Loma mo e ngaahi pule'anga o' māmaní, kae fokotu'u ai 'a e pule'anga ta'engata 'o 'Isilelí. Hoko mai 'a e Hā Fakakehé 'i he uhuhonga 'o e fetu'oaki ko 'ení. *"Pea na'e fakakehe hono angá 'i honau 'áo, pea na'e malama hono fōtungá 'o hangē ko e la'ā, pea ko hono ngaahi kōfú na'e hinaekiaki mai 'o hangē ko e maamá."* Pea hā 'a Mōse mo 'Ilaisiā, 'o fakakakato 'a e 'ata 'okú ne fakamanatu mai 'a e 'ata fakaholomamata 'o Mo'unga Sainai. Ne'ine 'i kalanga 'a Pita, ko 'ene lavelavemu'á ke ne fai ha ngāue ke fakamanatu 'aki 'a e koloa hāhāmolofia kuo nau 'inasi aí. Kae ongo mai 'a e le'ó: *"Ko hoku 'Alo Pelé 'ena, 'a ia kuó u hōifua aí; mou fakaongo kiate ia."* Na'e fiema'u ia ke 'ilo 'e Pita mo e kau akó 'a e mo'oni ko iá. Ko e le'ó tatau 'oku a'u mai kiate kitautolú. 'Oku tau takitaha nofo pē mo 'ene 'ilo, mo 'ene a'usia, pea taimi lahi 'oku tau mo'ua mo kitautolu 'i he fetu'oaki na'e mo'ua ai 'a e kau akó. 'Ikai 'oku tau ma'u 'a e 'ulungaanga 'o Pitá? Neongo 'a 'ene ta'emahinó, ka 'okú tau lavelavemu'á ke ngāue'aki 'a 'etau fakakaukau ke fai 'aki 'a e me'a 'okú tau loto ki aí. 'Io, 'oku tau vēkeveke ke fai 'a e ngāué, he 'oku tau 'ofa he lotú. Kā'oku kei 'aonga 'a e fakamaama na'e fai 'i he mo'ungá 'i he 'aho 'o e Hā Fakakehé; ke tau fakaongo kiate Ia, pea tau fou 'i he hala na'á ne tofa ki he'ene kau akó *"'Ilonga ha taha 'e fie kau mo aú, kuo pau ké ne tuku hono lotó ká ne fua hono kolosí 'o kaungā fononga mo au."*

'Ānau, Lotu mo e 'Aukai: La'ā he angatonu hā, 'O huluhulu homau halá, Hopo 'i homau laumālié, Mole 'a e kovi fulipē, 'Emeni.

Tokonaki, Fepueli 14: Lau Folofola – Mātiú 17: 1-9.

Ki'i Ama: Mātiú 17: 9a, "Pea 'i he'enau ō hifo mei he mo'ungá, na'e fonosi kinautolu 'e Sīsū, 'o pehē, 'Oua na'á mou tala ki ha taha 'a e me'a kuo hā, kae'oua ke tu'u mei he maté 'a e Fanautama 'a Tangatá."

Pou: ‘Ao: ‘Oku tau toe hokoatou pe he Lēsoni na’ a tau fakalaulauloto ai ‘aneafi. Kuo tau ‘inasi ‘i ha kongā si’i ‘o e ngaahi lelei ne lave ai ‘anautolu ne nau a’u ki he tumutumu ‘o e mo’ungá, mei he ngaahi Lēsoni ne tau fononga mai mo ia talu mei he Mōnité. ‘Oku mahino ‘a e nāunau’ia ‘o e tumutumu’i mo’ungá he ‘oku ‘i ai e ‘Otuá pea ‘oku fotu mo mahiki hake hono faka’ofo’ofá ‘o tāu mo e ‘Otua Lahi. Ka ‘oku fakamanatu mai ‘e he’etau Ki’i Ama ‘o e ‘ahó ní, ‘oku ‘ikai ke fai ha nofo lata ‘i he mo’ungá. Kuo pau ke fai ‘a e “hifo mei he mo’ungá.” ‘I he fononga ‘oku tau faí, kuo lahi pē ‘a e ngaahi taimi kuo tau ‘inasi ai ‘i he nāunau’ia ‘o e ‘Otua ‘o e funga mo’ungá. Pe ko e lotú, pe ko e taimi mālōlō mo kumi ivi, pe ko e konifelenisi pe fakataha’anga ‘o e Siasí, ka ‘oku ‘i ai ‘a e ngaahi taimi kuo tau a’usia ai ‘a e me’a na’e a’u tonu ki ai e kau Akó he ‘ahó ní. Ko e ngaahi mōmeniti ‘oku hāhāmolia, pea ka tau ‘inasi ai, ‘oku tau feinga ke fakalōloa mo fakalahi. ‘Oku hohoi ‘a e lotó, ke nofoma’u ai, he ‘oku felātani ‘a e feohi mo e kaungā fonongá, pea mahulu hake, ‘a e feohi mo e ‘Otuá. Ka ‘oku talamai ‘e he Ki’i Ama ‘o e ‘ahó ní, ‘a e fongá: kuo pau ke tau hifo mei he mo’ungá, ‘o foki ki he māmani ‘oku hokohoko ‘aho ai ‘a e tangi mo e to’é. Tau vakavakai pē ki hotau ‘ātakai mo e me’a ‘oku lolotonga hoko ai. Talu pe mei he kamata ‘o e ta’ufo’ou ni pea mo e vāvatau pe mo e longoa’ a ‘a e ngaahi mitia fakasosialé ‘i he ngaahi me’a ‘oku lolotonga hoko he to’o fatongia ‘a e ICE mo e vā ‘o ‘Amelika mo e ngaahi Pule’angá. Kuo hoha’atu’u si’otau kāinga ‘oku te’eki ai ke ‘i ai hanau faingamālie nofo fonuá pea ‘okú ne uesia ‘etau fai fatongia he Siasi he ‘oku ‘ikai ke toe kei malu’i kinautolu ‘i he ngaahi feitu’u na’e lau ko e “‘Elia Tapu” ki he kau Polisi pe ICE. ‘Oku tñaki mai pe ia ki he ngaahi faingata’ a fakalotofale ‘oku tau fekuki faka-fāмили pe mo ia pea tatau pe ki he lotofale ‘o e Siasi. Ko e faingata’ a tatau ‘oku fetaulaki mo e kau ngāue ‘iaté, he ‘oku fai pe tukituki mo e ngāue mo e tailiili pē. Ko e ngaahi tele’a eni ‘oku ‘uhinga ki ai ‘a e “hifo mei he mo’ungá.” Ko hotau fatongia ke tutu e maamá na’a tau hifo mo ia mei he mo’ungá ke huluhulu ‘aki ‘a e fonongá. ‘Oku hanga ‘e he ki’i Ouau Fakaola ‘o e Maamá he’etau ngaahi Ma’unga Kelesí ‘o fakasino mai ‘a e fakakaukau tatau. ‘Oku fakaola ‘a e Maamá he Tēpile ‘a e ‘Eiki ‘i he kamata ‘a e Lotú pea ‘oku ‘ave ‘a e Maama ko iá ‘i he tuku ‘a e Lotú ki tu’a ki he Siasí. Tau kau fakataha pe ‘i hono ‘ave ‘a e Maama ‘a e ‘Otuá ki he sosāietí ke huluhulu mo fakamaama si’a ni’ihi ‘oku lolotonga po’ulia ‘i he ngaahi “tele’a ‘o e faingata’á”, ‘i hotau lolotongá.

Sāpate, Fepueli 15: *Sāpate Hā Fakakehe (Lanu Hinehina pe Koula).*

Mōnite, Fepueli 16: Lau Folofola - Sēnesi 2: 15-17.

Pou ‘Ao: Fakafeta ‘i kuo tau ikuna e Fa’ahita’u ‘Epifani pea ‘oku tau teuteu atu eni ki he Pulelulu Fakaefuefue mo e kamata’anga ‘o e Fa’ahita’u Leniti. ‘Oku mālie hono ta’áú he ‘oku tau ‘i he Ngoue ‘i ‘Itení fakataha mo e ‘Uluaki Ongu Matu’á. ‘Oku tau ‘ilo mei he lēsoni ‘o e ‘ahó ní ‘a e mahu’inga ‘o e ‘ilo’i kitá mo e talangofuá. ‘Oku tau fononga he talanoa ‘o e foaki ‘e he ‘Otuá kia ‘Atama ‘a e tau’atāina ke filí. Pea a’u mai kiate kitautilu, ‘oku tau ‘osi ‘ilo’i fakapapau, ko e ngaahi me’a ‘oku hoko maí, ko e nunu’a pe ola pē ia ‘o ‘etau filí (*choice*). Hangē ko hotau Ki’i Amá, na’e ngaohi ‘e he ‘Otuá ‘a ‘Ātama pea tuku kiate ia ‘a e “... *ngouetapu* ‘o ‘Itení ke ngoue’i mo tauhi ia...” pea mo e fekau, “...*ka ko e Akau Ilo-o-e-lelei-mo-e-kovi* ‘e *ikai te ke kai mei ai*.” ‘I he ta’elata ‘a ‘Ātamá, na’e toe ngaohi ai ‘e he ‘Otuá ‘a ‘Ivi ‘o ‘omi kia ‘Atama pea fai ai ‘enau fetauhi’akí mo e fe’ofa’akí. Na’e lelei e me’a kotoa ka na’e ‘ikai nonga e ‘Uluaki matu’á he lelei kuó na ma’ú. Koe’uhi ko ‘ena holí mo e fie tatau mo e ‘Otuá, né na talangata’a ai ki he fekaú, pea kapusi ai kinua mei he Ngouetapú. Ko e fakaloloma tahá ko e mahino ko ‘etau talangata’a ki he ‘Otuá (angahala), pea ‘oku tau fakamavahe’i ai kitautilu mei he feohi mo e ‘Otuá. Ko ‘ene mole ai pē ia foki ‘a e tofi’á, ‘auhia atu mo hono ngaahi tāpuakí pea mo e ngaahi lelei ‘o e feohi tu’uma’u mo e ‘Otuá. ‘Io ko e nunu’a ‘o ha fili kovi kuó tau fai ko e mate ta’engata – nofo po’ulia he mo’ui angahala’ia. Ko hotau natula fakangatangata ia ‘i he’etau hoko mo e tangata mo e fefiné, ko e ‘ikai ke tau fiamālie pē he me’a ‘oku tau ma’ú. Ne si’i ‘apē, ‘a e Ngouetapu ‘o ‘Itení ke fai ai ‘e na kai filifilí, ká na feinga pē ki he fu’u ‘akau na’e ‘ikai ngofua ké na ala ki aí? Telia na’á tau tāpalasia si’i ‘Ātama mo ‘Iv́, ka ‘okú ke mea’i peá u lave’i ‘oku tau tōfuhia kotoa pē ‘i he fa’ahinga ongo vivili ko ‘eni ko e ta’etopono he me’a ‘oku tau ma’ú. ‘Oku kei fai pē e holi ia ke hulu atu mei he fe’ungá, pea tau iku mavahe ai mei Palataisi ‘o tō ki he po’uli ‘o e angahalá. Ko hotau natula ai pē ia ke ‘ahi’ahi’i e ngaahi me’a ‘oku hā ngali lelei mai kiate kitautiló. ‘Oku fakamatala’i lelei ‘e he Toketá ‘a e natula ko ía

‘i he Himi 596: 4, “...Ongongofua homau kakano, He ngaahi mālie ‘o māmani, Talu ai ‘emau lata heni, ‘O puli ‘a e Fonua Lelei.” ‘I he ‘etau teuteu atu ki he Fa’ahita’u ‘o e Lēniti, tau kau fakataha pe mo hotau Kaveinga, “Tataki ‘e he Maama ‘a e ‘Otuá: Sivišivi’i mo Fakatonutonu ‘etau tauhi kiate Iá.” Tauange ke tau ma’u fakahinohino mei he fili na’e fai ‘e ‘Atama mo ‘Ivi ke ne tokoni’i kitautolu ‘i he fili te tau fai lolotonga ‘etau tauhi’i ‘a e Lēniti toputapú ni.

‘Ānau, Lotu mo e ‘Aukai: ‘E ‘Otua, tuku ké u fe’unga pē mo e ngaahi tapuaki kuó ke faka’inasi ‘aki aú koe’uhi ke ‘oua na’a toe fakatupu ‘iate au ha holi ‘oku feinga ki he hulu atú kau angahala ai ki he ‘Afioná. ‘Emeni.

Tūsite, Fepueli 17: Lau Folofola – Senesi 3: 1-7.

Ki’i Ama: Senesi 3: 6-7, “Peá na’e vakai ‘e he fefiné ko e ‘akau ia ‘oku lelei ki he kaí, pea matamatalelei ki he matá, kae’uma’ā ko e ‘akau ke fai ki ai ha velelele ko ‘ene fakapoto’i, peá ne hanga ‘o toli hono fuá, ‘o kai, peá ne ‘ange foki ki hono husepaniti na’e ‘iate ia; pea kai mo ia. Pea ‘ā ai hona matá ‘osi pē, ‘o na ‘ilo tā ‘okú na telefua; peá na tui lou fiki, ‘o ngaohi ‘aki hāna vala.”

Pou ‘Ao: ‘Oku tau hokoatu pē he talanoa ne tau fakalaulauloto ai ‘aneafi. Ko e talanoa ‘eni ‘o e Tō ‘a e ‘Uluaki mātu’ā (*The Fall*), pea hiki ‘e Molitoni, “Ko e Fuofua Angahalá,” ko ‘ena talangata’i ki he ‘Otuá pea kapusi kinaua mei ‘Iteni. Neongo ‘etau afuhia he ngāue pangó ni, ka ‘oku tonu ke tau vakai ai ki he hū mai ‘a e angahalá ki he tangatá pea mo e fakatupu ‘a e ‘Otuá pea fakangata ai ‘a e feohi vāofi ne nau ‘inasi ai ‘i Palataisi. Mahino mei he lēsoni na’e fakatupu ‘e he ‘Otua ke lelei e me’a kotoa, ko e tangatá - ‘a e ‘Uluaki matu’ā, ne hū mai ai e angahalá ki māmani. ‘Oku mahu’inga ke tau ki’i vakai ki he olo ‘a e ngatá, pe ko e totolo mai ‘a e angahalá ke ma’u ‘etau mo’ui. ‘Oku lahi ‘a e tipeiti pe na’e lea koā ‘a e ngatá. Ka ‘oku fakafongā ‘e he ngatá ‘a Sētane ‘i he’ene tolotolo mai ‘o fakatauele’i ‘a ‘Ivi ‘o na tō ai mo ‘Atamá. ‘I he ‘uluaki fehu’i pe ‘a e ngatá ‘oku tau fakatokanga’i ai ‘a ‘ene mio’i e ‘uhinga mo e fekau ‘a e ‘Otuá. “Oku mo’oni koā kuo folofola ‘e he ‘Otuá ke ‘oua té mo kai mei he ‘akau kehekehe ‘o e ngouetapu? Fakatokanga’i ‘okú ne afe’i si’i pē ‘a e tu’utu’uni ‘a e ‘Otuá, ke fakamamafa ia ki he ta’ota’ofi ‘o hangē ‘oku ngali fakapōpula’i ‘a e ‘Otuá. Nofu e fehu’i ‘a e ngatá he ta’ofi, ka ko e fekau ‘a e ‘Otuá ia na’e tefito he faka’atā, “kai mei he ‘akau kehekehe ‘o e ngoué”. Ko e tali ‘a ‘Ivi, na’e mahino ai ‘oku ngofua kotoa e ngoue, tukukehe pe ‘a e fua ‘o e ‘akau ‘oku ‘i loto ngoué ... ‘E ‘ikai té mo kai mei ai, pea ‘e ‘ikai té mo ala ki ai, na’a mo mate.” Fakataokanga’i kuo ngāue loto ia ‘o ‘Ivi, he “ko e ‘akau lelei ki he kaí, pea matamatalelei ki he matá, kae’uma’ā, ko e ‘akau ke fai ki ai ha velelele ko ‘ene fakapoto’i.” Ko e fehu’i: Ko e hā e tokoni ‘a e talanoá ni kiate kitautolu pea mo ‘etau fekuki mo e angahalá? ‘Oku mahino he’ikai lava ‘e hotau ivi, pe potó, ‘o fehangaheangi mo e angahalá. ‘Okú ne mio’i e fekau ‘a e ‘Otuá ‘o tau hē ngofua ai, peá ne tuku ‘a e loto hu’uhu’u mo mahamahalo halá ‘iate kitautolu. ‘Oku mahu’inga, ke ‘oua te tau talitu’u ‘a angahala he ‘oku vaka mai he me’a kehekehe ‘i he taimi kehekehe, pea ‘oku mātu’aki mahulu atu hono mafai he tapa kehekehe ‘i hotau ki’i ivi fakapukupukú. ‘Oku ‘ikai moha toe hao’anga ka ko ‘etau ofi pe ki he ‘Eikí, he ko ia tokotaha pē té ne lava ke fakahaofi kitautolu (*redemption*) mei he olo poto ‘a e angahalá. Mo’oni ‘a Molitoni he Himi 536 v.3, “‘I he me’a kotoa, Ko e fu’u kolua, Ké te ofi ki he ‘Eikí, Té ne nofo ma’u ‘I ha me’a ‘e ha’u, Ko e Kāinga Ta’emahikí, Ko e me’a fē Té ne fa’a māvae Mei he ‘ofa ‘a Kalaisi? Te tau ō he vai, Mo e loto afi Kae ‘āsili ‘ene pikí, ‘Oka tau’i mai, Ko e me’a ke faí, Ké te ofi ki he ‘Eikí.” Ko Sīsū pē hotau hūfanga malú, ‘a Ia na’a ne toe fakafoki kitautolu he’ene pekiá, pea tau lava ai ke fakatō’ongamo’ui’i ‘etau tui, kae maama ai hotau lotó ‘o fai e me’a totonu he māmani feliuliakí ni.

‘Ānau, Lotu mo e ‘Aukai: Faka’ā hoku matá ‘e ‘Otua, ké u ‘ilo ‘a e me’a ‘oku totonu keu faí, ké u fakatomala’i ‘eku ngaahi angahalá pea fakasino ‘eku tui pikitai ki he ‘Afioná, ko hoku mo’ui’anga. ‘Emeni.

Pulelulu Fakaefuefu, Fepueli 18: Lau Folofola – Sioeli 2:1-2, 12-17.

Lēsoni: Saame 51:1-17; Sioeli 2:1-2, 12-17; 2 Kolinito 5:20b-6:10; Matiu 6:1-6, 16-21.

Ki’i Ama: Sioeli 2: 1, “MOU ifi talupite ‘i Saione, ‘Io, ‘ai ke maongo atu ‘i hoku mo’unga tapú; Ke tete ‘a e nofo fonua kotoa pē: He ‘oku hoko mai ‘a e ‘Aho ‘o e ‘Eikí, Seuke, ‘oku ofi.”

Pou ‘Ao: Na’e ‘i ai e lau ‘a e helo ‘o e Tala’otua - *Karl Barth* na’e pehē, “Ko e me’a fakamamahi taha he mo’ui ni, ko ‘ene a’u ki he ngata’anga ‘etau mo’ui pea tau fakatokanga’i na’e ‘ikai hatau mahu’inga ‘e taha ki he taumu’a ngāue ‘a e ‘Otuá.” ‘Oku ‘ikai ke kau e “ngata’anga” ia he me’a ‘oku tau nofo ‘o fa’a fakakaukau ki aí. Ko e toki taimi pe ‘oku tau faingata’a’ia fakaesino ai ‘o hangehangē ka ‘ikai toe taulanga, pea ko e toki taimi ia ‘oku tau

fakakaukau'i ai hotau ngata'angá. Ko e ngata'anga eni 'o Māmani, mo e hisitōliá, ko e 'aho faka'osí eni, pea 'e hā'ele mai 'a e 'Eiki 'i he ngaahi 'ao ke fakamaau 'a māmani. Na'e tokoni 'a e fu'u faingata'a kāfakafa na'e hoko ki 'Isileli 'i he taimi 'o Sioeli hono fakamanatu ki he Palōfítá 'a e 'Aho 'o e 'Eiki. Ko hono hiki he vahe kimu'á: *"Ko e me'a ne toe mei he he'e-ola kuo kai 'e he he'e-fakafolau; Pea ko e me'a ne toe mei he he'e-fakafolau, Kuo kai 'e he he'e-emo; Pea ko e me'a ne toe mei he he'e-emo, Kuo kai 'e he he'e-fohi."* Ko e situ'a atu 'a e fanga he'e ni, na'e hangē 'a e funga e fonuá kuo tutu 'e ha afi. 'Auha e me'a kotoa pe na'e tō ke ma'u mo'ui ai e kakai e fonuá, he na'e a'u ki hono 'ola mo hono fohi 'o e me'a na'e ala 'ola mo fohi. *"Na'a mo e fanga manu 'o e vao 'oku nau lolotu ki he 'Afiona: He kuo mātu'u 'a e ngaahi tafenga vai, pea kuo keina 'e he afi 'a e ngaahi kaikai'anga 'o e toafa."* Na'e ākitu'a mai he 'auha 'a e ta'ú mo e mate 'a e fanga manu na'a fangafangá, 'a e fu'u hongē faufaua - pea ko e iku'angá pe ko e mate fiekaia mo fieinua. Pea ko e ngata'anga ia 'oku fakatokanga ki ai 'a Sioeli ki 'Isileli mo Siutá. Kapau 'e 'ikai ke mou tafoki kia Sihova ko homou 'Otuá ko e mate'anga eni te mou iku kotoa ki ai, 'i he'ene hoko 'a e 'Aho 'o e 'Eiki. Ko e monū'ia 'anga 'o 'Isileli mo Siuta, 'o tatau pe mo kitautolu 'i hotau kuongá ni, *"He 'oku hoko mai 'a e 'Aho 'o e 'Eiki, Seuke, 'oku ofi."* Ko e taha 'o e ngaahi Ouau 'o e Efiafi Pulelulu Fakaefuefú, ko hono tā 'o e kolosí 'i hotau la'é, pea mo hono fakamanatu mai 'e he Faifekaú, **"Na'a ke ha'u mei efú, pea te ke toe foki pe ki he efu."** Ko e fakalea pe ia 'e taha 'o e fakatokanga 'oku fai 'e Sioeli. Ko e efu kotoa pe kitautolu, pea te tau toe foki kotoa pe ki ai. 'Oku tau fakakaukau kotoa pe foki 'oku 'ikai ha toe feitu'u te tau 'alu ki ai, ka ko Hēvani pe mo hono mo'ui ta'engatá. Ko e me'a kehekehe pe foki 'a e me'a 'oku tau faka'amu mo holi ki ai mo e me'a 'oku 'i he finangalo 'o e 'Otuá he 'aho faka'osí. Ko e talanoa ia 'a Matiu vahe 25 'okú ne fakamanatu mai, ko hotau vahevahe'i, 'o e sipi mei he kosí, 'oku fai 'aki ia 'a 'etau fakafōtunga na'e fai kiate kinautolu 'oku si'i hifo 'iate kitautolú. Tauange ke hoko 'a e Fa'ahita'ú ni, ko ha taimi ke toe fakalahi ange ai 'etau tokoni'i kinautolu 'oku fiema'u tokoni (fa'a foaki), lotu mo 'aukai ma'anautolu 'oku fu'u matu'aki fiema'u ha nonga ma'a 'enau mo'ui, pea tuku ke tataki kitautolu he'ene Maama pea fakatonu ai 'etau to'o fatongia ki he 'Eiki 'oku 'a'ana 'a e Ngata'angá.

'Ānau, Lotu mo e 'Aukai: "Pea na'a mo e taimi ni—ko Sihova ia mei he Ta'ehāmai—mou mātu'aki tafoki kiate au 'aki 'a e kotoa 'o homou lotó, pea 'aki 'a e 'aukai, pea 'aki 'a e tangi, pea 'aki 'a e tangilāulau." 'Emeni.

Tu'apulelulu, Fepueli 19: Lau Folofola – Loma 5: 12-19.

Ki'i Ama: Loma 5: 12, "Na'e kamata 'a e angahalá 'i māmani ko e ngāue 'a 'Ātama. Pea tupu leva mei he angahalá 'a e maté. Pea kuo fai angahala ai 'a e kakai kotoa pē, 'o pau leva ke nau mate kotoa pē."

Pou 'Ao: 'Oku kau e "angahalá" he me'a 'oku tau mātu'aki tokanga 'aupito 'aupito ki ai 'i he'etau feohi he Siasí, fāmili mo e sōsaieti. Ko hono pangó pē he 'oku 'ikai ko 'etau "angahalá," ka ko e "angahala" 'a e kakai kehé. 'Oku tau pōtopoto'i hono 'analaisó, 'a e me'a na'e tonu ke tukú mo ia na'e tonu ke fai 'enautolú. Faingofua ange ke tau sio atu 'i ha'atau sio hifo. 'E fēfē kapau te tau 'uluaki sivi vakili fakaeloto 'etau mo'uí ke 'ilo 'a 'etau ngaahi tōnounou pea mo e maumau 'okú ne fai kiate kitautolú, pea tau toki tokanga ki ha ni'ihi kehe. Ko e fakakaukau ia 'oku fokotu'u mai 'e he 'apositoló 'i he Lēsoni 'oku tau fakalaulauloto ai he 'ahó ni. 'Oku sio 'a Paula ki he angahala 'a 'Ivi mo 'Ātamá, pea ne tokanga'i ai 'oku āfuhia kotoa ai 'a e hako'i tangatá 'o a'u mai ai pē ki hotau kuongá ni. 'Oku fa'a pole'i 'e he ni'ihi 'a e fakakaukau ko eni 'i he'enua fakakaukau pē 'oku lava 'e ha angahala 'a ha "toko taha" ke ne maumau'i 'a e nofo 'a e Siasí, fāmili mo e fonuá. Hangē kiate au ko e me'a ia 'oku fokotu'u mai 'e Paulá, pea 'oku tau fakamo'oni kotoa pe ki ai he 'oku tau mātā tonu 'i he'etau fēngāue'aki he Siasí, fāmili mo e fonuá. 'Oku fa'a fai 'e he ni'ihi 'a e ngaahi me'a 'o ne maumau'i ai 'a e fe'ofa'ofani, ma'uma'uluta mo e feongoongoi 'a e feohi fakafāmili, Siasí mo e fonuá. Kuo lahi 'a e ngaahi Siasí kuo faka-fa'afa'ahi pea a'u ki he mavaeua koe'uhí ko ha ngāue pango 'a ha taha he kau memipá 'o e Siasí. 'Oku longoa 'a e fonuá koe'uhí ko e ngaahi fai hala 'a e ni'ihi na'e fai ki ai e falala 'a e kakaí. Kuo lahi 'a e ngaahi fāmili kuo femotumotuhi koe'uhí ko ha tōnounou 'a ha taha he fāmili. Ko e fakakaukau ia 'oku hunuaki mai 'e Paula 'i he Ki'i Ama 'o e 'ahó ni. Koe'uhí ko e angahala 'a 'Ātama mo 'Ivi, 'oku tau kaungā angahala kotoa ai pē. Ko hono leá, "Na'e fanau'i" kitautolu ko e me'a angahala. Fakafeta'i he 'oku 'ikai ko e talanoa faka'osi ia 'o e mo'uí ni. Hangē pē ko 'etau mate kotoa koe'uhi ko e angahala 'a 'Ātamá, 'oku tau ma'u faingamālie kotoa pē ke mo'ui 'i he PĒKIA mo e TOETU'U na'e fai 'e Kalaisí. 'Oku 'ikai vāvāofi 'a e angahala 'oku tau āfuhia ai mei he 'uluaki tangatá, pea mo e lahi faufau 'o e meesi 'oku tau ma'u mei he 'Otuá 'o fakafou mai 'ia Kalaisí. Ko e mahu'inga ia 'o e 'ofa kāfakafa na'e fai 'e Kalaisi 'i he'ene talangofua kakato ki he Tamái 'o a'u ki he'ene pēkia he kolosí, kae lava ai ke a'u mai kiate kitautolu 'a 'ene 'ofá mo 'ene fakamolemolé. Ko e feilaulau tā tu'o taha na'e fai 'e Kalaisi 'i he kolosi 'i Kālevalé pea mo'ui ai 'a māmani kotoa pē. 'Oku fakamā'opo'opo 'e Paula 'i he ongo veesi faka'osi e Lēsoni 'o e 'ahó ni, *"Ka 'oku faikehekehe 'aupito 'a e talangata'a 'a 'Ātamá pea mo e 'ofa 'a e 'Otuá. He ko e talangata'a 'a*

‘Ātamá, ‘oku fāi ai ‘a e tautea maté. Ka ko e ‘ofa ‘a e ‘Otuá, ‘oku lava ke vālelei ai mo ia ‘a kitautolu na’a tau toutou faiangahalá.”

‘Ānau, Lotu mo e ‘Aukai: ‘E Sīsū na’e pehē, Ho’o ‘ofa ki he maama, Na’a ke fehi’a ke mate hé; Ha taha angahala. ‘Emeni.

Falaite, Fepueli 20: Lau Folofola – Matiu 4: 1-11.

Ki’i Ama: Matiu 4: 1, “Pea taki atu ‘e he Laumālie Mā’oni’oni ‘a Sīsū ki he toafā ke sivi ai ia ‘e he tēvoló.”

Pou ‘Ao: ‘Oku kamata kotoa ‘a e Kōsipeli sio fakatahá pea mo e talanoa ‘o e kamata e ngāue ‘a Sīsū ‘aki hono papitaiso ia ‘e Sione ‘i he vai lahí pea mo ‘ene fanongo ki he le’o na’e ongo mai mei he Langí, “*Ko hoku ‘Alo pelé eni, ‘a koe ‘oku ou hōifua ai.*” Mahu’inga pē ki he kau fa’u Kōsipeli ke fakamahino mei he kamata’angá ‘o e misiona ‘a Sīsū, ko ia ‘a e “‘Alo tofu pē taha” ‘o e ‘Otuā Māfima’i. ‘Oku mahino na’e ‘afio’i pē ‘e Sīsū ‘a e taumu’a ‘o ‘ene misioná pea kuo hoko hono taimi ke kamata ai, pea ko e me’a mu’omu’a eni mo ‘uluaki ki ai ko ‘ene mavahe faka-e-ia pē (*on his own*) ki he toafā ke kumi ivi pea mo toe vakai’i ‘a e tu’unga ‘oku ‘i ai ‘a ‘ene mo’ui pea mo e Uí ‘oku fai kiate iá. Na’á ne ‘i he toafā ‘i he ‘aho ‘e 40 ‘o hangē ko e ta’u ‘e 40 na’e fononga ai ‘a ‘Isileli ‘i he toafā ‘i he’enua ‘ekisoto mei ‘Isipite ki he Fonua ‘o e Tala’ofá. Pea hangē ko hono sivisi’i ‘o ‘Isileli, na’e pehē hono ‘ahi’ahi’i ‘o Sīsū ‘e he tēvoló. ‘Oku lahi ‘a e ngaahi ‘uhinga na’e ‘i he toafā ai ‘a Sīsū, ka ‘oku ou fie fokotu’u atu ‘a e ki’i fakakaukau ko ení: Na’e mavahe ‘a Sīsū ki he toafā ke ‘oua na’a toe fanongo ki ha le’o ka ko e le’o pē ‘o e ‘Otuá. Kae pangó, he na’e ‘ikai ko e le’o pē ‘o e ‘Otuá na’e ‘i he toafā, ka na’e toe ‘i ai pē mo e le’o ‘o e tēvoló. Pea ko e natula ai pē ia ‘o e mo’ui ni, ko e nga’ahoa ‘a e me’a kotoa pē, pea mo e pau ke tau fili ‘o hangē ko ia na’e fai ‘e Sīsū, ‘a e le’o ke tau fanongo ki ai. ‘Oku lahi ‘a e ngaahi le’o kehekehe ‘i he mo’ui ni ‘oku nau fe’au’auhi ke tohoaki’i ‘a ‘etau tokangá ‘i he’enua faka’ali’ali mai ‘a e faka’ofa’ofa mo e masani ‘o e māmani ‘oku tau to’oto’ovalea ai. Ka ko e le’o pē ‘e taha ke fakamama’u ki ai ‘a ‘etau tokangá ‘o hangē ko ia na’e fakamama’u ki ai ‘a Sīsū, ko e le’o ‘o e ‘Otuá. Ko e le’o ia ‘o e mo’oni mo e mo’ui. Ko e halanga tāpuaki ia ma’á e fāmili, Siasí pea mo e fonuá. Ko e le’o ia ‘o e ‘ofa ‘okú ne hapai kitautolu ‘i he hala fononga ‘o e mo’ui ni. Ko e le’o ia na’á ne fakalotolahi’i ‘a Sīsū ke ne fakasitua’i ‘a e le’o ‘o e kakai na’á nau faka’amu ke hoko ‘a Sīsū ko ha Misaia ke ne fakahaofi kinautolu mei he Pule’anga Lomá. Fakafeta’i he na’e ‘ikai ke fakaongo ‘a Sīsū ‘i he toafā, ki he le’o ‘o e fu’u kakaí, ka ne fakamama’u ki he le’o ‘o e ‘Otuā Māfima’i, peá ne fakakakato ai ‘a hono Uí ‘i he Kolosí kae lava ke tau ma’u mo’ui ai pea ma’u ke lahi ‘aupito. ‘Oku ou fakatauange ‘e hoko ‘a e fa’ahita’u Lenití ni ko ha taimi ia ke tau fakapapau’i ai ‘a e LE’O ke tau fanongo mo muimui ki ai, he ko e mo’oni, te ne taki tonu kitautolu ki he monū’iá.

‘Ānau, Lotu mo e ‘Aukai: Tuku ke u fakaongo ma’u ki ho le’ó ‘e ‘Otuá peá u muimui atu he taimi kotoa pē ‘o ‘ouae tuku ‘i ha tau pe afe ha koloa. ‘Emeni.

Tokonaki, Fepueli 21: Lau Folofola – Saame 32.

Ki’i Ama: Saame 32: 1-2, “Monú’ia ā, ka ko e tokotaha kuo fakamolemole ‘ene talangata’á, kuo ‘ufi’ufi ‘ene faihalá. Monū’iá ā ko e ko e tangata ‘oku ‘ikai lau hia ki ai ‘a Sihová, pea ‘i hono laumālie ‘oku ‘ikai ha kākā.”

Pou ‘Ao: ‘Oku tau fakalaulauloto he Saame ‘oku fakakaveinga ko e Vete Angahala mo e Fakamolemole. Neongo ko e Saame ia mei he kuonga mu’á ka ‘oku mālie ‘a ‘ene fakamo’oni mai ki he lea ‘oku tau fa’a fakahua’aki ke ‘oua ‘e kukuta, kae tuku mai ki tu’a kae fiemālie hotau lotó. ‘Oku fa’a ‘ai ia ‘e he ni’ihi ke ‘oua ‘e feinga ke fūfū ha me’a he ko ‘ene lilolilo pe ka ‘e kio. ‘Oku kamata’aki pe ‘e he fatu Saamé ‘a e talamai ko e monū’ia ha taha “*kuo fakamolemole ‘ene talangata’á kuo ‘ufi’ufi ‘ene faihalá, pea ‘ikai lau hia ki ai ‘a Sihova.*” Ko e fakamahino mai na’e ma’u ‘e ha tokotaha ‘a e maama fe’unga ke tala pea tautapa ki hono ‘Otuá ke lea ‘o kole fakamolemole mo vete ‘ene talangata’á. ‘Oku ‘i ai hono monū’ia. ‘Oku tu’u fehangahangai ia mo e veesi 3, ‘okú ne talamai, “*ko e fakalongo pea ‘aufoe hoto ngaahi huí, pea ‘oku ‘aho mo ‘ene to’e.*” Ko e me’a ‘oku fai ki ai e hoha’á, pe ko e ha koā e ‘uhinga mahu’inga ‘oku fai ai e fakalongó? Ko e hā ‘oku ‘ikai lava ai ha tautapa hangatonu ki he ‘Otuā fai meesi mo ‘alo’ofá? Ko e hā ‘oku ‘ikai ke tau lea ai ki he ‘Otuā na’á ne ngaohi kitautolu ‘i hono ‘imisi, peá ne ‘afio’i lahi ange ‘e ia kitautolu, ‘iate kitautolu? Ko hono tali foki e ngaahi fehu’i ko ‘ení, ‘oku fai fakafo’itu’itu’i pe ‘o fakatatau ki he’etau fononga takitaha ‘oku faí. Kā ‘oku hangē ‘oku tau fakalongo he taimi lahi ko ‘etau fie puke ‘etau pōlepolé (*pride*). Ko e talanoa ‘a e palovēpi fakatonga, “Oku lava e toká ka ko e tué.” Ka ko e me’a ‘oku e’a maí, ko e fakalongó ko ‘etau teke ia ‘etautolu ‘a e kelesi ope mo tomu’a ‘a e ‘Otuá. ‘Ikai ko ia pē, ka ‘okú ke mea’i peá u lave’i, ko e fakamolemole ko e fakakoloa ‘ata’atā ia ‘a e ‘Otuá. ‘Oku talamai ‘e Molitoni he Himi 512: 2, “Ka ne lahi ‘eku tangí, Ka ne u fai ha ngāue lahi, Ta’e’aonga ai pe ia Ke huhu’i ‘eku hia, ‘Ikai ha’aku me’a ‘e ma’u, Piki

pe ki ho ‘akau.” Ko e konga ‘eni hono kei ui hingoa ai pe kitautolu ‘e he ‘Otuá ke tau tokanga ki he’ene ngaahi fekaú pea muimui ki ai ka tau lave hono ngaahi tāpuaki. Me’apango foki ko hotau ‘ulungaanga fakangatangá, ko e fakaongotuli pe ki he ‘Otuá mo ‘ene ‘ofá. Na’e ‘i ai e taimi na’e hangē ai kuo fīu e ‘Otuá he feinga mai, ‘omi ‘ene kau Talafekáu, kau Palōfita, kae kei tatakehe pe mo fakaongotuli ‘a e efú mo e kelemutú. ‘Io ko hono fakaa’u mai ‘o e ‘ofa ko iá, ko ‘ene mātu’aki hiki mai ‘ia Sisū Kalaisi. Ko ia na’á ne fua ‘etau ngaahi hiá kotoa ‘o fononga tokotaha he hala Via Tololosá, kae fai hono taukae’i. Na’á ne kei folofola mai pe mei he kolosí, “*fakamolemole’i kinautolu ‘oku ‘ikai ke nau ‘ilo ‘a e me’a ‘oku nau fai.*” Tauange ke tau kau fakataha pe mo e Kaveinga ‘okú ne huluhulu kitautolu he mahina ko eni, “Tataki ‘e he Maama ‘a e ‘Otuá: Sivisivi’i mo Fakatonutonu ‘etau tauhi kiate Iá.” Tauange ke pehē ‘etau fononga he Fa’ahita’u ‘o e Lenití ni.

‘Ānau, Lotu mo e ‘Aukai: ‘I he fai fononga é, ‘I he mohe ‘o e mate, Kaú ka hake mei fa’itoka, Puna ki he Ta’e’iiloa, Ava ‘o e Makatu’u, Tuku ke u hufanga atu. ‘Emeni.

Sāpate, Fepueli 22: *Sāpate ‘uluaki ‘i he Lēnití. (Lanu Valeti)*

Lesoni: Senesi 2:15-17, 3:1-7; Saame 32; Loma 5:12-19; Matiu 4:1-11.

Mōnite, Fepueli 23: Lau Folofola – Saame 121.

Ki’i Ama: Saame 121:1-2, “TE U tāngaki hoku matá ki he ngaahi mo’ungá: ‘E ha’u mei fē hoku tokoni?”

Pou ‘Ao: ‘Oku tau kamata ‘a e uike fo’ou ni pea mo e taha ‘o e ngaahi Saame manako ‘a e tokolahi. Ko e Saame ‘oku kau ki he ngaahi Saame ‘o e ‘Alu Haké, ‘o fakatatau ki hono ngāue’aki ‘e he kau ‘Isilelí ‘i he taimi na’e fai ai ‘a e fononga pilikimi ki Selusalema, ‘a e “Kolo ‘o e Tu’i Langi.” Pea taku foki ‘e he ni’ihi ‘o e kau Liliu Tohitapú ko e taha eni ‘o e ngaahi Hiva ‘o e Falalá (*songs of trust*), fakataha pea mo e Saame 125 mo e 131, he ‘okú ne uki ‘a e kau pilikimi kotoa pe ‘oku falala ‘Otuá ke nau kaungā fononga fakataha ki Selusalema. ‘Oku mālie makehe ‘a e ngaahi lea faka-punake ‘o e ta’angá ni, he ‘oku tuhu ki Selusalema, ko e kolo tu’u mo’unga, ka ‘oku heliaki ‘a e talaloto ‘a e Fatu Saamé ‘o ne lave’i mo e tūkunga fakaloto ‘o e mo’uí, ‘o ‘ikai ke ngata pē ‘i he ‘uhinga ki he sio ‘o e mata fakamātelí, ka ko e tefito’i ‘ulungaangá ‘okú ne tu’utu’unia ‘a e mo’uí, ‘i he fononga pilikimi ‘oku tau fai. Ko e tokotaha ‘oku fa’a tangaki hono matá ki he mo’ungá, ko e tokotaha ‘oku hu’amelie ‘a e mo’uí, ‘okú ne mavahe mei he ‘ulungaanga manuki mo e talanoa tukuhifo ‘o e kaungā fonongá. ‘Oku tau maheni mo kinautolu ‘oku mo’ui hangē ha “paká”, ‘ikai pē ke loto e fo’i paka ko é ke kaka hake ‘a e fo’i paka ko é. Ko e tau’aki fusi pe ki lalo ke nau pehepehē ai pē. Na’a mo e me’a ‘oku lelei mo kinokinoifí, ‘e kei malava pē ke fusi ki lalo ke kovi mo palakū. Ka na’e ngaohi kitautolu ‘e he ‘Otuá ke tau ‘ulungaanga ‘aki ‘a e “tangaki hotau matá ki he mo’ungá,” ‘o fakamahino ‘oku masiva ‘ilo ‘a e fonongá pea ‘oku tau fononga pe mo sio ki ‘olunga ke fai mei ai ‘a hotau faka taukei. Ko e akonaki ai pe ia ‘a e Potó, “*Falala ki he ‘Eiki ‘aki ‘a e kotoa ‘o ho lotó, ‘O ‘oua ‘e faaki ki ho poto ‘o’ou: Ke ke fakaongo kiate ia ‘i ho hala kotoa pē, Pea ‘e fakatonutonu ‘e ia ho ngaahi ‘alungá,*” (*Palovēpi 3:5-6*). Me’apangó ‘oku lahi mo lauta ‘a e ma’u’anga tala ‘oku fai mei ai hotau fakapotoa ‘i he kuongá ni. Kuo hoko ‘a e tekinolosiá ko e ma’u’anga tala tu’ukimu’a, ‘o kumi ki ai ‘a e tokolahi ke fakatonutonu ‘a enau fonongá. Pea falala ‘a e ni’ihi ki he poto mo e ‘ilo ‘a e kaungā fonongá. Ka ‘oku ongo mai ‘a e le’o ‘o e kau fononga pilikimi ‘o e kuohilí, ke fakamanatu mai “*ko hoku tokoni ‘oku meia Sihova, ‘a ia na’á ne ngaohi ‘a langi mo māmaní.*” Ko hono fongá, ko e lau Folofola, lotu, ‘aukai, mo e ngaahi ma’u’anga kelesi kuo fakamo’oni’i ‘i he lotu faka-Kalisitiané. Tauange ke tau toe fakapapau’i ‘oku “tangaki hotau matá ki he mo’ungá,” ‘o fou ia ‘i he’etau fai faka’utumauku ‘a e ngaahi ngāue ‘e ala ma’u ai ‘a e kelesi ‘oku fe’unga ke fakatonua ‘aki ‘a e fononga pilikimi ‘oku tau fai. ‘Ikai ngata ‘i he tonu ai ‘a ‘etau fonongá, ka te tau mavahe ai mei he ‘ulungaanga fakatuta ‘oku vivili pē ke veteki mo tukuhifo ha lelei. Tau tuku ke “Tataki (kitautolu) ‘e he Maama ‘a e ‘Otuá: (pea mo) Sivisivi’i mo Fakatonutonu (ke tonu) ‘etau tauhi kiate Iá.”

‘Ānau, Lotu mo e ‘Aukai: Hangē ko ha Fale Maamá ‘Ene tu’u mo’unga e, Fakaholo sio’anga He fonua fulipé, Nau lalaka hono maama ‘Ilo me’a masani ai, Ongo mai ‘a e ta’engata, Kite ‘a e fonua ko langi, ‘Emeni

Tūsute, Fepueli 24: Lau Folofola – Loma 4: 1-5, 13-17.

Ki’i Ama: Loma 4: 5, “He ka ‘i ai ha taha kuo te’eki ha’ane ngāue ‘aonga ‘e fai, ka ‘oku tui ki he ‘Otuá, ‘oku hoko pē ‘a e tui ‘a e tokotaha ko iá ko e me’a ke ne vālelei ai mo e ‘Otuá. ‘Io, ko e ‘Otuá, ko e fakamaau ia ‘okú ne ma’u mafai ke lau ‘oku tonuhia ha taha na’e mātu’aki halaia.”

Pou ‘Ao: Ko e tala-‘otua eni ‘o e Fakatonuhia’i ‘e he Tuí (*Justification by Faith*), pea na’e fai hono kikihi’i ‘e he kau helohelo ‘o e fatu Tohitapú mo e tala-‘otua talu mei he kamata ‘a e Lotu faka-Kalisitiané ‘o a’u mai pē ki hotau

kuongá ni. ‘Oku kei ‘i ai pē ‘a e ni’ihi ‘oku nau tui, tokua ‘oku hanga he’etau ngāue lelei ‘o fakatau hotau fakahaohaoá mo e fakatonuhiá. Ko e ‘uhinga ia ‘oku fai ‘osikiavelenga ai e ni’ihi ‘i hono fua ‘o e ngaahi kavenga ‘o e Lotú mo tauhi lelei’i honau vā ki he ‘Otuá mo e kaungā’api. Tukukehe ange ‘a e fakakaukau ‘o e veipā ‘a e Tuí mo e Ngāue, ko e toe talanoa faingata’a lahi mo ia pea toe fihi. Ko e Lēsoni ‘oku tau fakalaulauloto ai he ‘ahó ni, ko hono fakamahino mai ‘e Paula, ‘o ne ngāue’aki ‘a e Tamai ‘a e kakai Tuí – ‘Epalahame, **ko hotau fakalelei mo e ‘Otuá**, ‘oku fai ‘aki ia ‘etau TUÍ. Ko e ngāue lelei mo ‘aongá, ko e fua ia ‘o ‘etau tui ki he ‘Eiki ko Sīsū Kalaisí. ‘Oku tala’aki ‘a e kau muimui ‘o Kalaisí ‘a ‘enau fai ‘a e ngāue lelei ki he sosāietí pea a’u ai pē ki he ‘enau li’aki ‘enau mo’uí ke mole, kehe ke lāngilangi’ia ai ‘a e ‘Eiki. ‘Oku ma’ama’a ‘a e “kelesi” (*cheap grace*) ‘i hono lea’aki pē kae ‘ikai ke ngāue’i. Ko hono mo’oni ‘oku tokolahi ‘aupito ‘i he ngaahi Siasí, fāmili mo e fonuá ‘a e kakai ‘oku ‘ilo Folofolá, lava lelei mo hono ako ‘aki mo malanga’i, ka ko e kakai ‘oku fiema’u lahi taha hotau kuongá ni, ‘a kinautolu ‘oku nau mo’ui ‘aki ‘a e Folofolá ‘o hoko ‘enau tō’onga mo’uí ko e ako’anga ki he kakai kotoa pē. Ko e ‘uhinga ia hono fakatātā’aki ‘e Paula ‘a ‘Epalahamé, he ko e taimi ‘oku tau fakakaukau atu ai ki he fa’ahinga ui mo e fekau na’e fai ki aí, ‘i ha taimi na’e ‘ikai ai ke ne fakapapau’i pe KO HAI na’á ne UI iá, ‘oku tau mo’utafu’ua kotoa pē he fa’ahinga loto na’á ne tali ‘aki ‘a hono Uí. Ko e TUÍ ia. Fekau ke hiki, pea hiki. Fekau ke feilaulau’i hono foha pē tahá, pea ‘alu ke fai e feilaulau. Ko hai ha Tamai ‘iate kitautolu he kuongá ni ‘e lava ke tui falala ‘o ta’efehu’ia e Le’o na’e faongo ki aí ‘i ha fa’ahinga taimi na’e fele mo fafo ai ‘a e ngaahi “otua” faka-matakali ‘i he feitu’u na’e nofo aí. Ko e fa’ahinga tui ia ‘oku uki kitautolu ki ai ‘e Paula ‘i he Ki’i Ama ‘o e ‘ahó ni. Ko e fa’ahinga tui ia ‘oku fe’unga ke tau ‘ahi’ahi ke ma’u ‘i he’etau muimui’i ‘a Sīsū ‘i he toafá he Fa’ahita’u ‘o e Lenití ni. ‘I ha kuonga ongoonga’a mo faingata’a ‘o hangē ko ia ‘oku tau lolotonga fononga aí, ‘oku hake mai ‘a e ngaahi ‘ilo kehekehe pea faka’ai’i kitautolu ‘e he ngaahi me’a nunumoveté ke tau ‘uluaki fakapapau’i mo fakamo’oni’i ‘a e me’a kotoa pē, kimu’a pea tau toki tui ki ai. Ka ‘oku fokotu’u mai ‘e Paula, ko e me’a mu’omu’a mo ‘uluaki ki he mo’ui ‘a e kalisitiané, ko e TUÍ PĒ. Tau kau fakataha pe mo e Kaveinga ‘oku tau muimui’i he mahina ko eni, “Tataki ‘e he Maama ‘a e ‘Otuá: Sivisivi’i mo Fakatonutonu ‘etau tauhi kiate Iá.”

‘Ānau, Lotu mo e ‘Aukai: “Ko e tuí te tau lava ai, ‘A e tui mo e fa’a kātaki, Ko e māhafú ia. Tau fua kolosi pe ke a’u, ‘Etau kalauní kuo pau, ‘Oiau ‘a e Fiefia.” ‘Emeni.

Pulelulu, Fepueli 25: Lau Folofola – Senesi 12: 1-4.

Ki’i Ama: Senesi 12: 1-2, “Pea folofola ‘a Sihova kia ‘Epalame, ‘o pehē, ‘Hiki koe mei ho fonuá, pea mei ho tupu’angá, pea mei he fale ‘o ho’o tamai, ki he fonua te u fakahā kiate koe. Pea te u ngaohi koe ko e pule’anga lahi, pea te u fakamonū’ia koe, pea te u fakatau’olunga ho hingoá.”

Pou ‘Ao: Ko e vahe 12 ‘o e Tohi Senesí, ko e ui ‘o ‘Epalame pea ‘oku ‘iloa ai ia ‘i he Tukufakaholo ‘o e Lotu Faka-kalisitiane ko e “Tamai ‘a e kakai Tuí.” ‘Oku hiki ‘e he fa’u ‘Ipiseli ki he kakai Hepelū 11: 3-12, ko e kau maamaloa ‘o e tuí. Ko e mo’ui mo e ngāue ‘a ‘Epalamé na’e fai ‘aki ‘a ‘ene tuí. Na’e fekau ‘e he ‘Otuá ke ne hiki mei hono fonua tupu’angá ‘o ‘alu ki ha fonua te ne toki fakahā ange kiate ia. Na’e ‘ikai ha’ane teteki pe manavahē ‘i he ‘ikai ke ‘ilo ‘a e feitu’u ‘e ‘alu ki aí, pea na’e ‘ikai ke tokanga ki he’ene māvae mo hono fāmili, pea mo e li’aki ‘o hono kolo na’e tupu hake aí mo maheni aí, kae muimui ‘o fai ‘aki ‘a ‘ene Tui ki he ‘Otuá ‘okú ne fekau’i iá. Ko e a’usia ia ‘a Paula ‘i he’ene ‘Ipiseli ki Loma 4: 4, “Pea na’e tui ‘a Epalahame ki he ‘Otuá, pea na’e lau ia ma’á ne mā’oni’oni.” ‘Oku mālie ‘a hono ui ‘o ‘Epalamé, he na’e ‘osi fakahā ange ‘e he ‘Otuá ‘e ‘i ai ‘a hono tāpuaki, kapau ‘e talangofua ki he’ene fekaú. Ko e Ui ‘o ‘Epalamé, ko e koto fakakoloa ia ki ai mo e tāpuaki ‘o makatu’unga he’ene tui mo talangofua ki hono Uí. ‘Oku pehē foki mo ‘etau kau ki he Lotu lelei ‘a e ‘Eiki, ‘oku ui kitautolu ki he ngaahi fatongia kehekehe ‘i he Siasí. ‘Oku ‘i ai ‘a e ni’ihi ‘oku ui ki he ngāue faka-Faifekaú, Setuatá, Malangá, Akonakí, Failautohi Faka-Sāpaté, Taki Potungaue Talavou mo Finemui, Tauhi ‘api, Le’o matapā, mo e mēmipa fanongo etc. ‘Oku mahu’inga ki he ngaahi fatongia ni ke fai ‘aki ‘a e Talangofua kakato ‘oku kanoloto ‘aki ‘a e Tui. ‘Oku faka’uhinga’i ‘ia Hepelu 11: 1 ‘a e tuí, “‘okú ne fakasino ‘a e ngaahi me’a ‘oku ‘amanekina, ‘okú ne mafakamo’oni ‘a e ngaahi me’a ‘oku ‘ikai hā.” Ko Semisi ‘okú ne tu’uaki ko e tuí, kuo pau ke ngāue’i, “Pehē foki ‘a e tuí, kapau ‘oku ‘ikai ke ō mo e ngāue, ‘oku mate pe ia, he’ene tu’u tahá” (2:17). Ko hotau monū pea mo hotau tāpuaki ‘a hono māteaki’i ‘a e me’a ‘oku tau tui ki aí, ‘i he ngaahi fatongia kehekehe ‘oku ui kitautolu ki ai ‘i he Siasí, fāmili pea mo e sosaietí. ‘I he taimi ‘oku tau ngāue’i ai ‘a ‘etau tuí, pea ‘oku tau ma’u ivi mei he ‘Eiki na’á ne fai hotau Uí. Na’e talaloto ‘a e tangata’eiki Faifekau ‘e taha ‘o pehē, “Ko e ongo’i ia na’á ku ma’u ‘i he fuofua taimi na’á ku fakapapau’i ai, ‘oku ui au ‘e he ‘Eiki ki he ngāue faka-Faifekaú. Ko e mo’oni na’e lahi ‘a e fehu’i pea mo e tālafili ‘i he fāmili mo e kaungā fonongá, ka na’á ku loto lahi mo loto to’a he na’á ku fakapapau’i ‘a hoku Uí. Fakafeta’i pē ki he ‘Otuá ‘i he’ene tokoni’i au, he ko e ta’u ‘aki eni ‘e hongofulu pea mo ‘eku kei fakamo’oni, ‘oku te’eki te ne li’aki au ke u tuēnoa ‘i ha taimi.”

‘Ānau, Lotu mo e ‘Aukai: ‘E ‘Otua, tuku mu’a keu ma’u ha tui hangē ko ‘Epalamé, ke ‘oua na’á ku toe veiveiua, ka u hangahanga fai ‘a e finangalo ‘o e ‘Afiona. ‘Emeni.

Tu’apulelulu, Fepueli 26: Lau Folofola – Loma 4: 1-5, 13-17.

Ki’i Ama, Loma 4: 13, “He tala’ehai na’e fou fakalao mai ‘a e tala’ofá kia ‘Epalahame pe ko hono hakó, ‘a e pehē ko e ‘ea ia ‘e o’ona ‘a māmani: ka na’e fou mai ‘i he mā’oni’oni mei he tuí.”

Pou ‘Ao: Ko e hoko atu pē eni ‘i he Lēsoni na’a tau fakalaulauloto ai he Tūsitē. ‘Oku tau ‘osi ‘ilo’i kotoa pē ko ‘Epalahame ‘a e Tamai ‘a e kakai Tui pea hoko ko e mā’oni’oni pea ‘oku fakamo’oni ki ai e ngaahi ‘Ipiseli ‘a Paulá, ‘o hangē ko ia ‘oku hā ‘i he Ki’i Ama ‘o e ‘ahó ni. Na’e ‘ikai ko e hoko ‘a ‘Epalahame ‘o mā’oni’oni ‘o makatu’unga ‘i ha’ane ngāue ke pōlepole ai, ka ‘i he’ene tui pīkitai ki he ‘Otua. ‘Oku hanga ‘e Paula ‘o fakamahino heni ki he kau kalisitiane ‘i Lomá, pea kiate kitautolu ‘i hotau kuongá ni, ‘oku ‘ikai ko e tukufakaholo faka-Siú, pe ko honau fili ‘e he ‘Otua ke hoko ko ‘ene “kakai pelé” ‘a e ma’u’anga ‘o e mā’oni’oni. ‘Oku fa’a pehē pē foki ‘etau tuí, koe’uhí ko ‘etau ha’u pea mei he fonua na’e tuku ki langí, pea ‘oku taku ko e fonua lotu, pea tau fakakaukau ai pē tokua, ‘oku lelei ange ‘etau fai e lotú ‘i ha toe matakali, pea kuo tau mā’oni’oni ange mo ‘ilo ange ki he ‘Otua ‘i ha toe taha. ‘Oku fa’a pehē ‘e he fa’ahinga, ko ‘etau kau pē ki ha Siasi, kuo tau kau ‘i he lau ki he mo’ui ta’engatá. Ko e tafa’aki ‘e taha ‘o e fa’ahinga fakakaukau ko ení, te nau lau ko e kakai ‘oku ‘ikai kau ki ha Siasí ‘e ‘ikai ‘ausia ‘a e mo’ui ta’engatá. ‘Oku hanga ‘e Paula ‘o fakamahino mai, ‘oku ‘ikai ko e matakali, tukufakaholó, ngāue lelei pe kau ki he Siasi faka-kalisitiane, ‘oku ma’u ai ‘a e mā’oni’oni. Ko e mā’oni’oni ‘oku ma’u ‘aki ia ‘a e TUI PĪKITAI kia Sīsū Kalaisi, pea aka ai mo mo’ui ai, pea te tau toki kaungā ‘ea leva mo Kalaisi ki he Pule’anga ‘o e ‘Otua. Ko hono ‘ai mahino angé, ko hotau fakamā’oni’oni ‘i ‘oku fai ‘aki ia ‘etau tui pīkitai ki he ‘Eiki ko Sīsū Kalaisí. Ko e tukufakaholo ‘o e hoko ha taha ko e memipa ‘o ha fāmili ‘i he Pule’anga Lomá, kuo pau ke ohi mai e tokotaha ko iá ki he fāmili ke hoko ko e mēmipa kakato ‘i he fāmili, pea ‘e toki lau leva ‘oku ‘i ai ‘ene totonu ke ne hoko ko e ‘ea ki he koloa tukufakaholo ‘a e fāmili ko iá. Ko e fakakaukau tatau mo ia ‘oku hunuaki mai ‘e Paula ‘i hotau Ki’i Ama ki he ‘ahó ni. ‘Oku pehē ‘etau hoko ko e kaungā ‘ea mo Kalaisi ki he mo’ui ta’engatá. ‘Oku ohi kitautolu ‘aki ‘a ‘etau TUI ko Sīsū ko e ‘Alo ‘o e ‘Otua, pea ‘oku sila’i ‘aki ‘a e tui ko iá ‘a e ivi ‘o e Laumālie Mā’oni’oni, pea fai ‘e Kalaisi hotau fakatonuhia ki he ‘Otua ‘aki ‘a hono ta’ata’á, pea tau toki hoko ai ko hono kaungā ‘ea ki he mo’ui ta’engatá. Ko ia pē ‘a e mā’oni’oni ‘anga ‘o ‘Epalahamé, he na’á ne talangofua kakato ki he fekau ‘a e ‘Otua. Ko e mā’oni’oni ‘a ‘Epalahamé na’e fou mai ‘i he’ene TUI, pea ko ia ai pē ‘a hotau ‘amanaki’anga ki he mo’ui ta’engatá. Tauange ke pehē, ‘a ‘etau tui ta’etoaveiveiua ki hotau ‘Eiki ko Sīsū Kalaisí, pea tau mo’ui ‘iate ia, ‘o talangofua kakato ke fai hono finangalo ‘i he ‘aho kotoa ‘o ‘etau mo’ui.

‘Ānau, Lotu mo e ‘Aukai: Tui leva, tui leva ki he ta’ata’a. Ha’u kia Sīsū, ha’u kia Sīsū te ne fakama’a. ‘Emeni.

Falaite, Fepueli 27: Lau Folofola – Sione 3: 1-17.

Ki’i Ama: Sione 3: 14, “Pea hangē na’e hiki ki ‘olunga ‘e Mōsese ‘a e ngatá ‘i he toafá, pehē foki kuo pau ke hiki ki ‘olunga ‘a e Fanautama ‘a Tangatá.”

Pou ‘Ao: Ko e talanoa mālie eni ‘o e uhu po’uli mai ‘a Nikotimasi kia Sīsū. Na’e talitali ‘aki ‘e Sīsū ‘ene pehē ‘e ‘ikai ke mamata ha taha ki he Pule’anga ‘o e ‘Otua ‘o kapau ‘e ‘ikai ke “fānau’i fo’ou mei ‘olunga.” Ko e fehu’i ia ‘a e Falesí: *‘O lava fēfē ke fānau’i ha tangata ka kuo motu’a?* Ko hotau Ki’i Ama ki he ‘ahó ni ko e kongá ia ‘o e tali ‘a Sīsū ki he’ene fehu’i. Na’e fakamahino ‘e Sīsū kuo pau ke hiki ‘a e Fanautama ‘a tangata ki ‘olunga. Na’e ‘ikai ke toe faka’ape’apē ‘a Sīsū, he ko e me’a ia kuo pau ke hokó. Ko e **Fanautama ‘a tangatá** ko e taha ia he ngaahi huafa na’e ‘ai kia Siosiua na’á ne fakaa’u ‘a e fononga ‘a ha’a ‘Isilelí ‘i he hili ‘a e pēkia ‘a Mōsesé. Na’e mahino ‘a e mahu’inga makehe ‘a e Huafá ni kia Sīsū, ‘i he ‘ene fa’a toutou ngāue’aki ‘i he’ene fa’a talanoá. Ko e huafa ‘eni ne homo ai e kaati ‘a Pitá ‘i he’ene fetalanoa’aki mo Sīsū ‘i Sesalia Filipaí (Matiu 16). Hili pē hono fakavikiviki’i ‘e he ‘Eiki e tali ‘a Pita ‘ia Matiu 16:17, pea kamata talanoa leva ‘a Sīsū ki hono Huafa ko e “Fanautama ‘a e Tangatá” mo e ngaahi mamahi te ne fekuki mo iá. Ko e taimi ia ne māfana ai a Pita ‘o fai ‘ene fo’i ‘aliaki fakatuputupu langi, pea iku ‘o ui ai ia ‘e Sīsū ko e fo’i lii faka-Sētane. Ko hono falaia ‘e he Tauluá, *Matiu 16:23, “Kae tafoki ‘a Sīsū ‘o ne pehē ange kia Pita. ‘Tu’u ki mui Sētane!”* Na’e manako pē ‘a Sīsū ‘i hono Huafa – “Fanautama ‘a tangatá” koe’uhí ko ‘ene fakapapau’i te ne foua e Kolosí. Ko e Kolosí ko e fakakakato ia ‘o e ngaahi palōmesi ‘a e ‘Otua mei he kuohilí, pea koe’uhí ‘oku ‘ikai ke ‘i ai ha ‘Otua ‘e pēkia, pea kuo pau leva ke fakakakato ia ‘e he “Fanautama ‘a Tangatá.” Ka ‘e anga fēfē leva ai, ke a’u mai ‘a e fai fakamo’ui ‘a e ‘Otua na’e fakafou mai ‘i he “Fanautama ‘a Tangatá” ‘i ha Kolosi ne tu’u ‘i Palesitane, ‘i he laui senituli, kiate kitautolu ‘oku ‘i he fonua haú ni ‘i hotau kuongá ni? Ko e tuí, te ne faka’u mai e ivi ‘o e Kolosi ‘o Kalaisí kiate kitautolu he ngaahi ‘ahó ni. Ko kinautolu te nau tui ki he pēkia ‘a Kalaisi he kolosí, ko kinautolu ia te nau ma’u ‘a e mo’ui ta’engatá. Fakafeta’i

he kuo ‘atā e mo’ui ta’engata kiate kinautolu kotoa pē te nau tui ki he ngāue fakamo’ui na’e ‘uhinga ai hono hiki ki ‘olunga ‘a e “Fanautama ‘a Tangatā” ‘i he kolosí. Ko e kolosí, ko e mo’ui’anga ma’á e kau tuí, ka ko e mala’ia’anga ma’á e kau ta’etuí. ‘Oku tau lolotonga fononga’ia ‘a e Fa’ahita’u ‘o e Lēnití, ko e taimi ‘o e teuteu atu ki hono hiki ki ‘olunga ‘o e “Fanautama ‘a Tangatā,” pea ‘oku mahu’inga ke tau teuteu fakaeloto ke tali e kolosí ‘aki ‘a ‘etau fa’a lotu, fa’a foaki mo e ‘aukai. Tauange ke hoko ‘a e Fa’ahita’u ‘o e Lenití ni ko ha taimi ia ke tau toe ofi ange ai kia Kalaisi pea tau feinga ‘i he tokoni mai ‘a e Laumālie Mā’oni’oni ke faka-tō’ongamo’ui’i ‘a ‘etau tuí ‘i he tauhi vā ‘oku fai ki he ‘Otua mo e kaungā ‘apí ‘i he ‘aho kotoa pe.

‘Ānau, Lotu mo e ‘Aukai: Mālō Sīsū ho’o kātekina ‘a e Kolosí mo hono fakamā, kae ‘atā ai e mo’ui ta’engata kiate au. ‘Emeni.

Tokonaki, Fepueli 28: Lau Folofola – Senesi 12: 1-4.

Ki’i Ama: Senesi 12: 1:4, “Pea hiki ‘a ‘Epalame, ‘o hangē ko e folofola ‘a Sihova kiate iá; peá ne ‘alu mo ia ‘a Lote: pea na’e fe’unga ‘a Epalame mo e ta’u ‘e fitungofulu mo e ta’u ‘e nima ‘i he’ene mahu’i mei Kalanā.”

Pou ‘Ao: Ko e hokoatu pē eni ‘i he talanoa ki he Uí ‘o ‘Epalamé na’a tau fakalaulauloto ai ‘i he Pulelulú. Ko e Uí, pea mo e talangofua ki he Uí, ko e ongo me’a kehekehe pē. Na’e lahi pē ‘a e kakai na’e Uí ka na’e ‘ikai ke nau talangofua ki honau Uí. Ko ‘Epalame, na’e talangofua ia ‘o hangē ko e ki’i Ama ‘o e ‘ahó ni. Na’e ‘ikai ke faingofua ‘ene hiki he kuo motu’a, kuo a’u ki he ta’u faka-‘Otua ‘o e ngū. Ko e kau vaivai eni ‘i hotau ngaahi fai’anga lotú. Ko e ni’ihi kuo poaki mai ‘i he fatongia malangá pea ‘oku ‘ikai ke kei lava ‘o tauhi mai e ngaahi ma’unga kelesi. Ko e nāunau pe ia ‘o e a’u ki he ta’u ko iá. Ka ‘oku kehe ‘a e natula ia ‘o ‘Epalamé he neongo ‘ene motu’a mo e hangē ka ‘ikai ke toe lava ha me’á, ka na’e kei loto lahi pe mo falala kakato ki he ‘Otua pea talangofua ki ai. ‘E lau ‘e he ni’ihi ‘oku ngali fakavalevale ke fai ha ui peheni ki ha taha ta’u motu’a peheni. Pea ‘e mo’oni ia ‘o kapau ‘oku tau falala ki hotau ivi pe ‘otautolú. Ka na’e ‘ikai pehē ‘a ‘Epalame, na’e falala ia ki he ivi ‘o e ‘Otua na’a ne ui iá. Ko e ‘Otua pea mo hono mafai mo e ivi na’a ne fakafaingofua’i e me’a na’e mei faingata’a kia ‘Epalamé. Ko e nāunau ia ‘oku fakamatala’i ‘aki ‘a e ‘Otua ‘i hotau lolototonga, ko hotau ‘Imanuelá. Ko ‘ene kau mo kitautolu ‘i he taimi kotoa pē ‘o tataui ai pē, pe ko e hā e tukunga ‘o e mo’ui ‘oku tau ‘i ai. Na’e ‘ikai ko ha fononga faingofua ‘eni kia ‘Epalame, he na’e lahi ‘a e ngaahi faingata’a na’e fepaki mo ia ‘i he’ene fononga. ‘Oku talanoa ‘a e kongafaka’osi ‘o e vahe 12, ki he taimi na’e a’u atu ai ki ‘Isipité, pea ‘i he’ene fetaulaki mo Feló, na’a ne fakahā ai ki he Tu’í, ko Selá, ‘a hono uaifi, ko hono tuofēfine, koe’uhí ke ‘oua na’a fakapōngi ai ia. Neongo na’e lahi ‘a e faingata’a na’a ne fetaulaki mo iá, ka na’e ‘ikai lava ke ne uesia ‘a e tui ‘Otua ‘a ‘Epalamé. Na’e ‘i ai e taimi na’e fiu ai ‘a ‘Epalame he talí ke ‘i ai hano hakó, peá ne ‘omi ‘a Heka’ā, ke fakakakato e tala’ofa ‘a e ‘Otua, he kuo ngali ‘e ‘ikai toe fanau ‘a Sela he kuo motu’a. Na’e kei falala pē ‘a e ‘Otua kia ‘Epalame pea kei tu’u ma’u pē ‘ene palōmesí. Na’e toki fakakakato ‘a e palōmesí ‘i he liliu hono hingoá mei he ‘Epalamé ki he ‘Epalahamé peá ne a’u ‘o ta’u teau pea toki fanau’i ai ‘e Sela ‘a hono foha na’e tala’ofā, ‘a ‘Aisake. ‘Oku tau takitaha pē e ‘uhinga ki he’etau hiki mai mei hotau fonua tupu’angá ki he fonua háu ni. Na’e ‘ikai ke faingata’a ‘a ‘etau hiki mai he na’e ‘osi mahino pē ‘a e lahi ange ‘o e ngaahi faingamālie ma’á e fāmilí ‘e ma’u he fonuá ni. Ko ‘Epalame na’a ne ‘alu ‘aki pē ‘a ‘ene tuí ki he feitu’u na’e ‘ikai te ne lavelave’iloa pē ‘oku fēfē. Na’e faingofua pē ke “puna ki he ta’e’iloá” he na’e tui mo falala kakato ki he Le’o ‘o e ‘Otua Māfima’i. ‘E mahu’inga pē ke tau fai pehē mo kitautolu, ‘o tau falala ki he Le’o ‘o e ‘Otua, lolotonga ‘etau fononga’ia ‘a e fa’ahita’u ‘o e Lenití ni.

‘Ānau, Lotu mo e ‘Aukai: Fakafeta’i atu ‘e ‘Otua, ‘i ho’o falala kiate au ‘o hulu atu ia ‘i he’eku falala kiate au, pea mo ‘eku falal ki he ‘Afioná. ‘Emeni.